



Milik Departemen P dan K
Tidak diperdagangkan
Untuk umum

Hikayat Eelia Tujoh

Ramli Harun



Departemen Pendidikan dan Kebudayaan

Direktorat
Kebudayaan

2



899.2292
RAM
h

HIKAYAT EELIA TUJOH

PPS/Ac/2/80

Milik Dep. P dan K
Tidak diperdagangkan

Hikayat EELIA TUJOH

Diterjemahkan oleh
RAMLI HARUN

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1981

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

PERPUSTAKAAN DIT. SEJARAH & NILAI TRADISIONAL	
nomor induk	: 283/1284
tanggal terima	: 8-8-84
sekt/hadiah dari	: Proyek PPS 10
Nomor buku	:
Kopi ke	: 2

KATA PENGANTAR

Bahagiailah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalan sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahannya pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Museum Banda Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1981

Proyek Penerbitan Buku Sastra
Indonesia dan Daerah

RINGKASAN HIKAYAT EELIA TUJOH

Cerita ini dimulai dengan peristiwa tiga orang yang terkurung dalam sebuah gua. Sesudah masing-masing mereka menyatakan perbuatan baik yang pernah mereka lakukan dan bermohon kepada Tuhan supaya amal mereka diterima, maka akhirnya pintu gua itu terbuka.

Kemudian cerita tiga orang Yahudi datang kepada Khalifah Umar menanyakan beberapa masalah yang kalau dapat dijawab mereka akan masuk agama Islam. Dengan bantuan Ali bin Abi Talib semua pertanyaan orang Yahudi itu dapat terjawab. Antara lain ditanyakan dengan apakah pintu langit dibuka dan ditutup. Ali menjawab bahwa langit dibuka dengan mengucap dua kalimah syahadah dan ditutup dengan syirik. Ketiga orang Yahudi itu mendengar jawaban yang tepat itu segera masuk agama Islam. Kemudian orang-orang Yahudi itu menanyakan tentang tujuh orang yang tidur selama 309 tahun dalam sebuah gua yang kemudian bangun kembali. Ali mengatakan bahwa cerita itu berasal dari kitab suci al-Quran yang ringkasannya sebagai berikut:

Ketika sebuah kerajaan di negeri Rumawi diperintah oleh seorang raja yang beragama Islam, hidup tujuh orang anak muda yang taat kepada agamanya. Di masa itu ada seorang penggembala yang tidak beragama bernama Dikyanus. Pada suatu hari ketika Dikyanus menggali sumur untuk mencari sumber air buat ternaknya ia menemukan sebuah peti berisi emas permata yang menurut keterangan seorang ahli, harta itu adalah peninggalan Karun yang terpendam bersama hartanya dahulu kala karena ia tidak membayar zakat.

Dikyanus menjadi kaya raya dan dengan kekuatan hartanya ia memberontak terhadap raja yang memerintah. Akhirnya ia menjadi raja. Diantara yang menjadi pembantunya ialah enam orang pemuda Islam. Karena haus kekuasaan akhirnya ia meminta kepada rakyatnya untuk menyembahnya sebagai Tuhan.

Sesudah beberapa lama berkuasa anak muda itu merencanakan pembunuhan terhadap Dikyanus karena mereka tidak setuju Dik-

yanus menuhankan dirinya. Tetapi rencana mereka diketahui oleh Dikyanus dan akan membunuh keenam anak muda yang telah berkhianat kepadanya. Salah seorang diantara keenam anak muda itu yang bernama Tamlikha mengetahui rencana raja. Merekapun memutuskan untuk meninggalkan negeri itu.

Dengan modal harga sebatang pohon yang dijual oleh Tamlikha mereka berangkat diam-diam. Di tengah jalan mereka bertemu dengan seorang anak muda yang kemudian mengikuti mereka. Ikut pula seekor anjingnya. Ketujuh pemuda itu sampai di sebuah gua di daerah pegunungan. Mereka masuk ke dalam gua itu dan anjing mereka menjaga di pintu. Dengan kehendak Tuhan mereka tertidur nyenyak dalam gua itu, sementara raja Dekyanus sudah memerintahkan rakyatnya untuk mencari dan membunuh keenam pemuda itu. Sampai raja Dikyanus meninggal mereka tidak diketemukan.

Tiga ratus tahun sudah berlalu. Di masa itu negeri diperintah oleh seorang raja Islam bernama Abdurrahman. Ketika itulah ketujuh pemuda itu terbangun. Mereka merasa lapar dan Tamlikha yang masih mempunyai simpanan uang pergi ke pasar secara diam-diam untuk berbelanja. Tetapi alangkah herannya ketika ia melihat semua sudah berubah. Di pintu masuk sebuah lapangan tertulis kalimah syahadah dengan Isa sebagai Rasul. Dengan petunjuk seseorang ia sampai di pasar. Dari orang itu ia mendapat penjelasan tentang nama bandar dan raja negeri itu. Tamlikha meminta tolong kepada orang itu untuk membeli makanan dengan menyerahkan uangnya. Orang itu heran melihat mata uang lama. Tamlikha mengatakan bahwa uang itu diperolehnya dari menjual pohon kayu dan pergi menyembunyikan diri di dalam gua karena hendak dibunuh oleh raja Dikyanus beberapa hari yang lalu. Orang itu mengatakan bahwa raja Dikyanus berkuasa 309 tahun yang lalu. Berita aneh itu tersiar luas sampai kepada raja yang segera memeriksanya. Tamlikha menceritakan segala yang terjadi atas diri mereka.

Raja beserta pembesar-pembesar negeri pergi bersama Tamlikha ke gua tempat mereka tidur untuk menyaksikan kekuasaan Tuhan yang ajaib itu. Menjawab pertanyaan raja, di antara pemuda

itu ada yang mengatakan bahwa mereka baru tidur satu setengah hari, yang lain mengatakan baru satu hari. Raja Abdurrahman menjelaskan bahwa mereka sudah tidur selama 309 tahun. Ketika raja mengajak mereka pulang ke tempat mereka masing-masing mereka menolak dan ingin menetap terus di dalam gua itu.

Ketujuh anak muda itu berdo'a agar Tuhan segera mencabut nyawa mereka. Selesai berdo'a ketujuh anak muda itu meninggal.

Di pintu gua itu raja memerintahkan supaya dibangun sebuah mesjid untuk keperluan orang-orang yang akan berziarah.

Jakarta 31-8-1981

Diterjemahkan dan diringkaskan
dari naskah berbahasa Aceh

oleh:
Ramli Harun

HIKAYAT EELIA TUJUH

Bismi l-lahi r-rahmani r-rahim

Tujoh boh isem nyang that mulia
Ibnu Abah nyang po riwayat
Jeuet keu ubat tamse peunawa

Sabda Nabi saiden karim
Tujoh isem neuyue aja
Neuyue peurunoe kanak-kanak
Na meung jarak mara baya

Bek jeuet jipeurab iblih laknat
Deungon beureukat nama Eelia
Antara Isa deungon Muhammad
Ureueng nyan meuhat saboh masa

Dalam tapeuse geuriwayat
Nan got sipheuet geupeunyata
Suraton Kahphi bak juh Sobeuhan
Di sinan teelan lahe nyata

Padum-padum na peureuman Tuhan
Peungajaran keu Nabi kita
Ureueng nyan tujoh lapan ngon asee
That meuteuntee kalam Rabbana

Aseuhabon Kahphi ureueng tujoh
Beurangsoe troh jarak baya
Sangkira tasurat nibak rumoh
Peunyaket gadoh jioh bala

Adat geutet rumoh han tutong
Tuhan tulong ngon seubabnya
Dum pancuri han jeuet jikarat
Seubab beureukat nama eelia

Ngon raseuki keumudahan

Karonya Tuhan Rabbon Sama
Sangkira tasurat nyan bak bidok
Han le dudok beurangian masa

Han le karam dalam laot
Beuthat ribot nyang lageena
Jarak tupheuen jioh bakat
Deungon beureukat nama eelia

Hana Tuhan bri geutanyoe meukarat
Ngon beureukat asoe guha
Aneuk miet moe nyang that kayem
Tasurat isem tujuh nama

'Oh lheueh tasurat bak keureutah
Teuma takeubah bak teumpatnya
Atawa taboh dalam bantai
Han le sagai jimeujaga

Jimoe han le jieh mangat
Seubab keuramat nama eelia
Bek han tasurat wahe sabat
Kasiet le that Tuhan karonya

Ureueng nyang meugoe nak got pade
Tasurat le nama mulia
Tasurat bak kayee harah beukeunong
Di teungoh umong nyan tapula

Sigala peunyaket han le keunong
Tikoh ngon geusong han le jilangga
Ubat mumang pi sit jeuet that
Nyan tasurat beukeunong kutika

Bak jaroe uneun nyan taikat
Karonya halarat sijuek angeeta
Mumang gadoh tuboh mangat
Ngon beureukat nama eelia

Ureueng nyang bunteng jeuet sukaran
Tasurat teelan singra-sigra
'Oh lleueh tasurat teuma talipat
Lheueh nyan taikat bak uram pha

Bak pha uneun nyan taikat
Tulong halarat budak keulua
Budak teubiet deungon mangat
Karonya rahmat Tuhan Asa

Aneuk ngon nang jeuet seulamat
Deungon beureukat nama Eelia
Sangkira tame bak meuhukom
Meunang he kawom jinoe gata

Beutangui surat wahe teelan
Keunong atoran narit gata
Bak sapai uneun nyan taikat
Meunang meuhat dawa gata

Beuta pateh sunggoh-sunggoh
Sit beutaboh bak keupala
Sit beutangui beuranggajan
Karonya Tuhan jarak bala

Sangkira gata raja boh salah
Keunong amarah teumeureuka
Teuma 'oh tajak tangui surat
Meu'ah meuhat han le meureuka

Akai peunoh soe nyang surat
Leubeh pangkat lagi ngon kaya
Sangkira tabri bak inong madeueng
Burong bajeueng han jeuet jidaya

Han jeuet jijak umi sebeuyan
Meuteumee meunan dalam sabda
Umi sebeuyan inong syeetan
Jidaya ensan budak keulua

Meung na surat jarak jih that
Deungon beureukat nama mulia
Paidah le that han ek peugah
Malingkan Allah nyang ek hingga

Jeueb-jeueb rumoh beuna tatroh
supaya jioh mara baya
Wahe kawom tatroh surat nyoe
Aduen adoe dum beurata

Adat han jeuet tasurat keudroe
Taupah adoe tabri beulanja
Ka han jeuet droe gob taupah
Beulanja taboh dum sikada

Bek keuh tasyen upah tabri
Meung han pakri meuteumee laba
Deungon seubab tatroh surat
Neubri beureukat bak areuta

Ngon raseuki keumudahan
Seubab teelan nama mulia
Raseuki mudah baya gadoh
Soe nyang na troh nama eelia

Beureukat kramat isem nyang tujuh
Tuhan peutroh ban nyang sabda
Sobhanallah wabihamdihi
Maha suci Allah Ta'ala

Gadoh beunci teuka gaseh
Meung tapateh kalam Rabbana
Sobhanallah walhamdulillah
Nyoe lon kisah nama eelia

Tuhan tulong nibak malang
Jinoe lon karang seun sibanja
Lon tueng beureukat nibak guree
Lon tueng teurajee bak ulama

Ulon peu-Aceh juh Sobeuhan
Tulong Tuhan beuk leungka
Supaya muphom bak ureueng dungee
Nyang na eleumee dum sikada

Deungon mukjizat sigala nabi
Bak Tuhan bri iman samporeuna
Kalam Tuhan beu ek lon seuon
Hingga ajai lon hilang nyawa

Deungon beureukat kalamullah
La ilaha illallah beu ek lon kata
Watee sukruet neubri seulamat
Soe nyang ingat kalimah mulia

Deungon beureukat ayat Kuruan
Peureuman Tuhan nyang mulia
Peureuman Allah dalam Kuruan
Dumteuh teelan bek talupa

*Qala l-lahu Ta'ala: Amhasibta anna ashaba l-kahfi
wa r-raqimi kanu min ayatina 'ajaba*
Neudeungo nibak 'Ujnon Na'im
Makna Rakim nyang calitra

Lhee droe ureueng weh di gampong
Jak lam gunong meudiwana
Teukeudirollah meuleuha kudrat
Nyum rhet langet atueh keupala

Ban jikalon lalu jiplueng
Seun rot meuteumeung saboh guha
Guha batee sangat indah
Jitamong pantah sigra-sigra

'Oh sare troh jih u dalam
Rhet le meugom pinto guha
Guha teutop nyan ngon batee
Pakri lagee lheueh u lua

Laiu jimarit sabe keudroe
Pakri geutanyoe teubiet u lua
Beuranggakri han ek tailah
Meungkon bak Allah tamupinta

Peue na amai Tuhan teurimong
Jinoe tatueng sinan pahla
Talakee bak Allah dumteu jinoe
Beuleupah geutanyoe nibak guha

Cuba taingat dum geutanyoe
Tangadu droe bak Rabbana
Kri cit narit teuma nyang sidroe
Geuhareutoe bak nyang dua

Tadeungo adoe lon hareutoe
Masa saboh roe lon keurija
Nibak peunyum lon moseutajabah
Jinoe lon peugah bak Rabbana

Lon peupah gob pubuet amai
Lon bri pangkai ngon beulanja
Ban nyang maklum lon bri meuhat
Ulon peuadat beurangjan masa

Bak siuroe upah ka meuhat
Meunan adat lon keurija
Nibak siuroe Tuhan teukeudi
Sidroe paki nyan jiteuka

Rupa pigot saleh han soe
Ureueng lakoe that takuwa
Ulonteu peudong lon yue ibadat
Upah meuhat ulonteu peuna

Ulonteu kheun bak ureueng nyan
Tadong kaman sinoe gata
Taibadat sikhian uroe
Upah dumnoe kubri keu gata

Sadum ngon upah nyang siuroe
Tadong sinoe muda balia
Lheueh nyan jidong sikhian uroe
Tuhan jipujoe hana reuda

'Oh trok bak hat sikhian uroe
Jilakee droe nyan jigisa
Lon bri upah ban nyang janji
Lalu paki ka jibungka

Ureueng nyang dilee teuma sudi
Padum na tabri keu muda balia
Teuma lon peugah ban nyang lon bri
Beungeh paki nyang peutama

Ulon nyang pubuet siuroe suntok
Sadum cit tajok lagoe belanja
Yoh nyan ka beungeh bukon bubarang
Paki jiriwang ka jibungka

Tinggai upah jih jiboh droe
Ulonteu dudoe sosah raya
Upah nyang tinggai leumo lon bloe
Oseuha droe lon peulara

Jimeuaneuk hana teudoh
Hingga troh ploh peunoh blang raya
Padum lawet akhe dudoe
Ureueng saboh roe lom ka teuka

Umu tuha sangat la'eh
Thatkeuh leumoh jeueb angeeta
Lalu jingadab bak lon sidroe
Upah saboh roe nyan jipinta

Leumo pi le jeuet bak ulon
Ka troh rukon bak lon kira
Ulon peujok teuma upah
Leumo barollah milek gata

Teuma jikheun lon peuwayang
Hana sayang lon ka tuha
Ulon meusumpah wallah billah
Sabet nyo sah milek gata

Lon peugah hai keulakuan
Di asai phon lon calitra
Teuma jipuwoe leumo habeh
Sit lon gaseh hate suka

Nyankeuh amai lon he teelan
Nibak Tuhan lon tueng pahla
Ya Tuhanku tadeungo kamoe
Lon pubuet nyoe keureuna gata

Ya Ilahi wa ya Rabbi
Keu lo neubri jalan keulua
Meunyo ekeulah amai lon nyoe
Beuleupah jinoe nibak guha

Kalam pi rhet nyan di babah
Gunong pi crah peungeuh teuka
Baro leumah cahya uroe
Jiyue lom dudoe bak teelannya

Cuba digata mohon bak Allah
Kadang mee teuhah pinto guha
Teuma meututo sidroe teelan
Dilon pi rakan bah lon cuba

Dilon pi na saboh amai
Peureubuatan utong muda
Bak saboh masa yoh saboh roe
Deuek that nanggroe makanan hana

Makanan le bak lon sidroe
Laen sinaroe han sapeue na
Inong dara teuka bak kamoe
Ngon sambinoe jroh that rupa

Rupa that jroh hana lawan
Tamse intan jiplueng cahya
Jijak gade bak lon makanan
Yoh masa nyan peue hale na

Jilakee makanan bak lon sidroe
Dara sambinoe jroh that rupa
Peue na makanan teungku jinoe
Ulonteu nyoe lapa dahaga

Adat na makanan neubri jinoe
Deuek uroe nyoe hana tara
Suara mangat han teupeugah
Rupa indah sang meutia

Rupa sambinoe jroh that laku
Ulon napsu teuka hawa
Teuma lon kheun bak ureueng binoe
Ulonteu nyoe napsu keu gata

Tadeungo ulon po sambinoe
Ulonteu nyoe teuka hawa
Nyang keu gata hate lon that
Peue nyang hajat ulon peuna

Meung tapeutroh hawa lon nyoe
Beurangapeue jinoe lon bri keu gata
Deumi jideungo lon kheun laku
Neupreh teungku sikleb mata

Lon jak tanyong bak suami
Meung ka neubri ulon teuka
Ureueng binoe jiwoe ninan
Jijak kheun yoh nyan bak judonya

'Oh sare troh bak suami
Jitanyong kri pantah sigra
Habeu jipeugah gob meukeusud
Lakoe jiseuot peue salah na

Ka jilakee jakleh tabri
Mubek mate aneuk cut raya
Lheueh nyan jijak ureueng binoe
Janji bunoe ka jirila

Teuma lon kheun bak ureueng binoe
Taek keunoe sigra-sigra
'Oh sare troh jiek bak ulon
Laju jilhon leumah angeeta

Jitumpok ija leumah eerat
Lon maken that teuka hawa
'Oh sare rab ulon keunan
Yo jih yoh nyan miseue geumpa

Teuma lon kheun bak ureueng binoe
Pakon meunoe yo angeeta
Ureueng binoe teuma seuot
Seubab lon takot keu Rabbana

Ngon leumah-leumbot nyan jiseuot
Jikheun jitakot keu hak Ta'ala
Seubab lon takot nyan ke Tuhan
Leungo badan yo angeeta

Deumi lon deungo meunan jipeugah
Dilon pi sosah hate lam dada
Leumoh ngon tuboh teumakot hate
Lon tanyong le pantah sigra

Pakri tatakot nyan keu Tuhan
Lon sukaran hana tara
Ureueng binoe lom jiseuot
Leumah-leumbot ngon suara

Allah he teungku lon takot that
Seksa sangat lam nuraka
Nyankeuh seubab leungo badan
Lon takot keu Tuhan teumeureuka

Peue jeuet magat teungku jinoe
Page dudoe keunong seksa
Teuma lon kheun bak inong nyan
Bit kong iman that digata

Lheueh lon kheun nyan teuma dudoe
Lon pi han soe teumakot raya
Ulon takot keu poteu Allah
Teuka gundah hate lam dada

Lon tob eerat buet han jadeh
Teuma lon weh pantah sigra
Buet han jadeh lon tob eerat
Lheueh nyan lon teebat ngon nasuha

Ulon teebat lon bri kiparat
Keureuna eerat ka teubuka
Lon bri seudeukah keu ureung hinoe
Jitren jiwoe bak judonya

Nyankeuh amai ka lon pei
Meung nyo ekeulah beulet
Ya tuhanku neudeungo ka
Lon pubuet nyoe keureuna gata

Jakalee neutueng amai lon nyoe
Beuleupah jinoe meuteubiet u lua
Jikheun pi lheueh gunong pi teuhah
Deueh le leumah nyan u lua

Kakeuh leumah mata uroe
Peungeuh sampoe ban saboh guha
Jieu ulua leumah dum peue
Peungeuh meusimpreue sigala donya

Han cit na jeuet lom jiteubiet
Mantong meugriet dalam guha
Teuma meututo sidroe teelan
Nyankeuh rakan nyang keutiga

Dilon pi na yoh saboh roe
Bakeuti lon sidroe keu ibu bapa
Ma lon ngon ku tuhaneuh that
Lon hareukat mita beulanja

Lon tueng upah geubeue kameng
Keu napakah ibu ngon bapa
Geunab beungoh lon prah ie abin
That bit yakin keu nang bapa

Beungoh seupot puwoe ie abin
Keu minoman droeneuh dua
Bak siuroe teukeudirollah
Ujeuen Yoh nyan troh ngon sinja

Uroe pi seupot ulonteu woe
Ayah dua droe teungeuet indra
Ngon ie abin lon mat di jaroe
Ayah dudoe lon preh jaga

Simalam suntok lon dong sidroe
Ayah lon sidroe hana jaga
Phon sinja kon hingga suboh
Hana saboh pi na jaga

Hate lon gundah bukon bubarang
Mangkong lon tatang troh 'oh paja
Lon dong sidroe dalam seupot
Hate teumakot saleh meureuka

Awai suboh teukeudi Tuhan
Jaga yoh nyan ureueng dua
Neubeudoh ayah neukalon ulon
Lon jok mangkong pantah sigara

Bak neusangka ulon ban troh
Neucok mangkong neutren lanja
Neutroh ie abin yoh nyan rijang
Neujak seumbahyang pujoe Rabbana

Lon pi lon tren yoh nyan sajan
Jak tueng ie seumbahyang ngon ayaheunda
Ayah bunda ulonteu sidroe
Malam uroe pujoe Rabbana

'Oh lheuuh seumbahyang beuranggajan
Jak tueng upahan bak ureueng kaya
Ulon peulara ureueng dua droe
Han lheueng uroe mita beulanja

Ranub pineung bu ngon eungkot
Beungoh seupot lon jak mita
Lon bloe ija deungon bajee
Nak bek malee bak ureueng lingkla

Yoh masa nyan lon that jeumot
Sira ngon panyot lon jak mita
Lon tueng upah geubeue kameng
Jeueb-jeueb gampong meureuraba

'Oh troh watee lon seumbahyang
Rijang-rijang pujoe Rabbana
Keureuna ulon peudeh untong
Pat meuteumeung ureueng kaya

Lon beudoh ninan jak geubeue kameng
'Oh lheuuh nyan saweue ayaheunda
Tinggai rahmat teuma dudoe
Woe u nanggroe keukai baka

'Oh lheuuh lon tanom bandua droe
Teutap lon nyoe han le goga
Meunankeuh buet dilon sidroe
Masa yoh roe untong muda

Nyankeuh amai dilon sidroe
Beuleupah jinoe teubiet u lua
Ya Tuhanku tadeungo kamoe
Lon pubuet nyoe keureuna gata

Meunyo ekeulah amai lon nyoe
Beuleupah jinoe ya Rabbana
Kalam pi lheueh gunong pi teuhah
Yoh nyan leupah teubiet u lua

Teukeudirollah meuleuha kudrat
Ban lhee meuhah lheueh u lua
Yoh nyan ka teubiet ureueng lhee droe
Meunan adoe saboh calitra

Meunankeuh dum maseng riwayat
Deungo sabat dum beurata
Makna rakim neukheun loh batee
Meunan meuteuntee saboh calitra

Aseuhabon Kahphi sinan meusurat
Geutroh meuhah di pinto guha
Loh nyan geuboh dalam peutoe
Meunan adoe saboh calitra

Sobeuhanallah po lon Rabbi
Aseuhabon Kahphi lon calitra
Antara Isa ngon Muhammad
Meunan sabat dalam sabda

Aseuhabon Teerit nyang riwayat
Teudeungo bak saidina Uma
Bak siuroe Tuhan teukeudi
Lhee droe Yahudi keunan teuka

Lhee droe Yahudi teuka keunan
Meututo yoh nyan sidroe panita
Ngon tuanteu Uma Yahudi marit
Jitanyong keubit jipareksa

Yahudi jidong di hadapan
Jitanyong yoh nyan pantah sigra
He ya Uma di likot Muhammad
Peutimang rakyat mat neuraca

Gata Raja bak masa nyoe
Peutimang nanggroe peukong agama
Jinoe kutanyong dum masaalah
Beutapeugah he ya Uma

Meung jeuet tapeugah masaalah nyoe
Reumbang bak kamoe agama gata
Nyo Muhammad sibeuna Nabi
Hana meudeungki kamoe dum na

Meung han jeuet tapeugah masaalah nyoe
Kon bak kamoe agama gata
Nabi Muhammad bukon Rasui
Nyo beurangpeue tipee daya

Saidina Uma neudeungo meunan
Neujaweueb yoh nyan pantah sigra
Tacuba tanyong he Yahudi
Tulong Rabbi akan hamba

Lalu jitanyong uleh Yahudi
Langet pane gunci ngon geubuka
Kubu nyang jak ngon asoe-asoe
Nyang peuingat kawom droe kon manusia

Kon jeuneh jen wahe saidi
Beurapa lagi masaalahnya
Limong peukara jinoe lon tanyong
Peugah beukeunong bek meuriba

Nyang limong nyan tapeugah ma wang
Hana jikandong le ibu bapa
Manok kukuek peue jipeugah
Takheun beusah tapeunyata

Di cangguek peue jikkeun jinoe
Di mirahpati peue jikata
Bahkeuh dumnann dilee siat
Cuba taingat ube nyang ka

Saidina Uma tundok ulee
Meunyum malee bak panita
Néutundok ulee nyan u bumoe
Sireuta neumoe ro ie mata

Han jeuet neupeugah tanyong Yahudi
Hana Tuhan bri eleumee lam dada
Lalu jibeudoh panita Yahudi
Ngon jikheun kri pantah sigra

Nabi Muhammad nyo kon Nabi
Jinoe meudeungki kamoe dum na
Agama Iseulam nyo bit bateue
Nyo beurangpeue tipee daya

Teuiem sukot dum na Eseulam
Meunyum masam ngon ie muka
Panita Yahudi maken girang
Sulaiman gurantam pantah sigra

Na sikeujab Yahudi girang
Mengurantam ngon suara
Nyan geupeunan Sulaiman Parisi
He Yahudi tadeungo hamba

Piyoh siat he Yahudi
Saidina Ali jeh ka teuka
Deumi leumah saidina Ali
Teuiem Yahudi sikutika

Saidina Ali pi troh keunan
Uma yoh nyan hate suka
Yoh nyan beudoh neujak mat jaroe
Sira neumoe ro ie mata

Mumat jaroe ban nyang adat
Hate mangat saidina Uma
Lheueh nyan teuma nakeuh siat
Sulaiman isyarat jaweueb sigra

Peue jitanyong uleh Yahudi
Sulaiman Parisi neucalitra
Na sikeujab lheueh nibak nyan
Ali yoh nyan lalu beukata

He Yahudi jinoe kapeugah
Peue masaalah tanyong gata
Jinoe tatanyong he Yahudi
Jaweueb lon bri tanyong gata

Rasulollah neupubeuet ulon
Eleumee meuhimpon didalam dada
Meuribee pinto nibak eleumee
Allah bri thee akan hamba

Insy Allah tacuba tanyong
Beukeunong-keunong sueue gata
Teutapi na hajat kamoe
Tadeungo jinoe he panita

Meunyo tatem masok Iseulam
Jinoe lon bri pham nyang sijahtra
Meutatem ucap dua kalimah
Jinoe lon peugah tanyong gata

Meutatem pubuet ban di kamoe
Lon jaweueb jinoe tanyong gata
Jinoe lon jaweueb dalam Teerit
Ban nyang narit Nabi Isa

Jaweueb Yahudi jikheun na'am
Saidilanam nyo sibeuna
Nyo Muhammad sibeuna Nabi
Han meudeungki kamoe dum na

Ulonteu tem masok Eseulam
Ulonteu pham ban digata
Ulonteu tamong agama Muhammad
Beule rahmat keu kamoe dum na

Lheueh nyan jitanyong uleh Yahudi
Nibak Ali jipareksa
Saidina Ali tundok ulee
Neudeungo lagee tanyong panita

Phon jitanyong le Yahudi
Saidina Ali neudeungo nyata
Pinto langet peue keu gunci
Wahe Ali peue ngon geubuka

Musyeurek billah jaweueb Ali
Nyankeuh gunci laen hana
Ureueng musyeurek amajjih tan
Neutop le Tuhan pinto dum na

Aneuk gunci taucap syahdat
Langet meuhat pinto teubuka
Pinto langet tujuh lapeh
Bandum habeh pinto teubuka

Kaphe musyeurek meugunci meuhat
Taucap syahdat mangat geubuka
Lom meututo saidina Ali
He Yahudi tanyong lanja

Lom jitanyong uleh Yahudi
Ubak Ali jipareksa
Kubu jijak asoe didalam
Jinoe tabri pham keu kamoe dum na

Jaweueb Ali tanyong Yahudi
Neupeugah kri pantah sigra
Kubu nyang jak asoe didalam
Jinoe tapham he panita

Nyankeuh eungkot nyang 'uet Nabi Noh
Jime ban saboh u laot raya
Nyankeuh kubu jijak ngon asoe
Nyang laen sinaroe meunan hana

Lom jitanyong le Yahudi
Ubak Ali jipareksa
Na sapeue treuk wahe kawom
Deungo bandum cuba peunyata

Geukheun kon jen bukon ensan
Saleh peue nan ya saidina
Jaweueb Ali yoh masa nyan
Neupeugah nan nibak panita

Nyankeuh sidom Nabi Sulaiman
Bak ri turonan he panita
Lom jitanyong uleh Yahudi
Ubak Ali jipareksa

Limong peukara jinoo kutanyong
Hana jikandong uleh bunda
Saleh peue nan nyan geurasi
He ya Ali cuba peunyata

Jaweueb Ali yoh masa nyan
Neupeugah nan limong peukara
Nama nyang phon Nabi Adam
Nyankeuh tapham nyang peutama

Keudua unta Nabi Saleh
Keulhee kibah Nabi Ibrahim
Keupeuet sidom Nabi Sulaiman
Binatang nyan asoe syeureuga

Nyang limong nyan tadeungo jinoo
Nini geutanyoe tuanti Hawa
Teuma jitanyong le Yahudi
He ya Ali neupeugah lanja

Manok kukuek uroe ngon malam
Nyan tabri pham keu kamoe dum na
Peue jipeugah nyan jikukuek
That bit kusyuek taeu rupa

Jitangah u langet jiteukui u bumoe
Sang jinoe ro ie mata
Ulee meuanggok got that lagee
Peue jibri thee manok beukata

Jikeupak sayeuep jianggok ulee
Got that lagee taeu rupa
Jiteukui tangah peukeuh jikheun
Peuleuheuen-leuheuen nyan jikata

Leumah leumbot suara peuleuheuen
That bit hireuen taeu rupa
Jipeugah peue uroe ngon malam
Jinoe tabri pham ya saidina

Jaweueb Ali tanyong Yahudi
Neupeugah kri manok beukata
Jikeupak sayeuep jirukuk sujud
Tuhan Makbut han jilupa

Jikeupak sayeuep yoh masa nyan
Jipujoe Tuhan Rabbon Sama
Jikeupak sayeuep jianggok ulee
Sit jibri thee keu manusia

Sireuta jikheun uzkur Allah minal ghafilin
Wahe mukmin bek that lupa
Jiyue ingat keu poteu Allah
Bek that dasyah ingat keu donya

Nyankeuh jikheun manok kukuek
Takalon kusyuek yoh jikata
Jipeuingat ureueng nyang laloe
Han thee keudroe ateuh donya

Han thee keudroe peuneujeuet Tuhan
Page teelan masok nuraka
Manok kukuek nyan jipeugah
Tapham beusah he panita

Lom jitanyong le Yahudi
Ubak Ali jiyue calitra
Suara guda tadeungo meuhihi
Jinoe neukheun kri peue jikata

Jaweueb Ali tanyong Yahudi
Guda meuhihi neupeugah makna
Tadeungo kupeugah he Yahudi
Guda meuhihi nyoe jikata

Al-lahumma unsur ibadana mukminina 'alaika farrin
Do'a keu mukmin jilakee le guda
Beuseunang mukmin beutalo kaphe
Meunan sabe jikheun le guda

Neupeugah pi lheueh uleh Ali
Panita Yahudi tanyong lanja
Di mirahpati peue jipeugah
Hireuen dasyah kudeungo suara

Sang-sang jikheun kubru-kubru
Meunan laku bunyoe suara
Ali deungo jitanyong meunan
Neupeugah yoh nyan pantah sigra

Di mirahpati jikheun yahu
Jikheun teungku alem ulama
Jiseurapa nyang tueng adat gle
Nyang tueng wase adat kuala

Jiseurapa geunab uroe
Riyoh bunyoe geunab masa
Hana teudoh nyan di babah
A l-lahumma l-'una l-'asyarah

Ya Tuhaku neubri laknat
Keu ureueng tueng adat bak kuala
Nyankeuh jikheun di mirahpati
He Yahudi pham le gata

Yahudi tanyong hana teuduek
Suara cangguek peue jikata
Cangguek peue jikheun rih sabé
Neupeugah le ya saidina

Jaweueb Ali hana teuduek
Suara cangguek neucalitra
Nyang su cangguek ucab teuseubeh
Laphai sareh pujoe Rabbana

Hana laloe teuseubeh jiseubot
Subhana rabbi l-makbud nyan jikata
Jiucap teuseubeh hana khali
Jipujoe Rabbi Tuhan Nyang Asa

Suloh nyang akhe dum jibeudoh
Hana saboh nyang han jaga
Sireuta jiucap sobeuhan Rabbon Makbud
Tuhan jiseubot rata-rata

Yahudi deungo jaweueb Ali
Jiucap le kalimah dua
Kalimah jiucap hate mangat
Eleuham halarat dalam dada

*Asyhadu alla ilaha illa l-lah wa asyhadu anna Muham
madan 'abduhu wa rasuluh;* Yahudi sunggo masok agama
Nyang dua treuk di sinan teelan
Jimeuiman sajan panita

Habeh ban l'hee masok Eseulam
Tren eleuham dalam dada
Teuma dudoe saboh treuk kawom
Ban saboh bhom rukon panita

Nyang na roh bhom bandun keubok
Habeh masok bak agama
Bandum jitamong agama Eseulam
Tren eleuham bak Allah Ta'ala

Teumayong lom panita Yahudi
Ubak Ali jipareksa
Jitanyong eleumee dijih hana tok
'Oh lleueh jimasok bak agama

Yoh nyan jitanyong rijang pantah
Na masaalah nyang goh lon buka
Nyoe na saboh masaalah
Jinoe tapeugah ya saidina

Jaweueb Ali rijang pantah
Tanyong beuhabeh uleh gata
Tulong Allah mukjizat Nabi
Jaweueb lon bri tanyong gata

Yahudi deungo tuto Ali
Jitanyong le pantah sigra
Ureueng jameun geukheun tujuh droe
Han lon tusoe geukheun nama

Lhee reutoh sikureueng thon 'oh lleueh mate
Teuma udeb le miseue nyang ka
Nanggroegeuh pat namageuh soe
Ureueng tujuh droe mate lam guha

Asee saboh geukheun sajan
Ngon nyan lapan geujak tapa
Ureueng tujuh droe lapan ngon asee
Sit meuteuntee geujak tapa

Geujak tapa dalam gunong
Teuma geutamong dalam guha
Peue nan guha peue nan gunong
Nyan lon tanyong ubak gata

Sit nyankeuh tuan tanyong kamoe
Tapeugah jinoe ya saidina
Saidina Ali lleueh neupike
Neujaweueb le tanyong panita

Yoh nyan neujaweueb uleh Ali
Sabda Nabi neucalitra
Na teuseubot dalam Kuruan
Sipheuet gob nyan ban sineuna

Ashabon Kahphi ban tujuh droe
Di Rom nanggroe teumpat ayaheunda
Mideuen Akeusuh nan Bariah
Jaheliah nyang boh nama

Ureueng Iseulam nama teusurat
Meunan teuseubot dalam calitra
Seulayeye keurajeuen Malek Saleh
Alem pi leubeh lagi wara'a

'Oh lheueh mate nyan teuma dudoe
Laen meugantoe nyang meuagama
Keurajeuen Kianoh teuma dudoe
Raja pindoe tan agama

Kianoh nyan raja Parisi
Jimeuungki keu agama
Jigeubeue kameng jih nyan dilee
Hana soe thee jeuet keu raja

Teukeudirollah meuleuha kudrat
Meuteumee teumpat kayee raya
Di yub kayee nyan sinan jipiyoh
Kameng pi troh keunan teuka

Na sikeujab Kianoh piyoh
Kameng pi troh sangat dahga
Jikurek tanoh ie jimeung bri
Tuhan teukeudi lagi mata

Jikurek tanoh yoh masa nyan
Leumah disinan peutoe raya
'Oh ban jieu leumah peutoe
Jipeurab jaroe ka jibuka

Teuma jikalon keureutah jroh-jroh
Kianoh ploh yoh nyan sigra
Meusurat didalam mise kitab
Kheuet pi jroh that hana tara

Kianoh me u meunasah
Bak tuan syiah jiyue baca
Cuba teungku beuet surat nyoe
Kuteumee bunoe lam peutoe raya

Dalam peutoe bunoe kuteumee
Di yub kayee kukueh teulaga
Lon kurek tanoh bak bri ie kameng
Seun sreut meuteumeung peutoe raya

Ie kameng pi han meuteumee bri
Laju peureugi keunoe bak gata
Le that teungku surat didalam
Han jeuet lon pham pueh that basa

Peunoh peutoe surat didalam
Han jeuet lon pham laen basa
Nyankeuh teungku lonme keunoe
Neubeuet jinoe peue na haba

Kianoh jok surat keunan
Teungku syeh nyan jeuet neubaca
Syiah nyan tuha umu ka jameun
Silayeue keurajeuen Nabi Musa

Surat neubeuet basa dilee
Syeh nyan geuthee umu ka lama
Haba lam surat that jilakab
Basa Kitab Nabi Musa

Syiah neubeuet surat bak jaroe
Raja Karon nyoe nyang po areuta
Haba lam surat habeh muphom
Dua blah geudong meuh lingjanya

Masa raja bumoe peureulan
Ngon meuh sajan ji'uet lanja
Masa Karon ji'uet le bumoe
Seurapa droe Nabi Musa

Nabi Musa yue boh jakeuet
Bek jireubot Allah Ta'ala
Han jiikot Nabi peugah
Nabi jitukah jikheun meudina

Nyankeuh seubab raja Karon
Bumoe peureulan u yub donya
Dua blah mon peunoh limpah
Syeh nyan peugah neucalitra

Syeh nyan peugah bak Kianoh
Meuh that damoh jeueb teulaga
Kianoh tanyong jinoe pat teupat
Nak kujak kueh tatueng dua

Teungku syeh nyan peugah teupat
Kianoh meutat-tat hate lam dada
Nyum beuhabeuh tatueng sidroe
Yo ngon asoe miseue geumpa

Kianoh woe le u romoh
Jiheh mehmoh iseutirinya
Tasurung lham keunoe rijang
Kumeung me u blang jak kueh teulaga

Hanã pat le bri ie kameng
Tame rijang uroe ka sinja
Ureueng binoe teuma seuot
Pakon 'oh seupot neukueh teulaga

Adat malam pi leumah deuh
Buleuen peungeuh peue gundah gata
Ureueng binoe teuma surung lham
Kianoh u blang jijak lanja

Watee mugreb rab troh 'isya
Kianoh lanja nyan jisapa
Na sikhan rot Kianoh jak
Seun sreut meurumpok iblih cilaka

Teudong di rot miseue syiah
Hana ubah sang ulama
Kianoh kalon yoh nyan that deuh
Ureuing keumiet meuh ban jisangka

Kianoh eu hana ubah
Meubajee jubah sang ulama
Iblich laknat yue dong Kianoh
Bek that mehmoh tajak gata

He Kianoh kadong dilee
Kadeungo kee saboh bicara
Kajak riwang dilee pantah
Kapoh syiah nyan beupana

Kapoh syiah jeh beumate
Meuh nyan bek le kawueuk dua
Meuh na habeh katueng keu kah
Jak leh pantah ka enanya

Ban jideungo iblich peugah
Dum geukeubah didalam dada
Gotkeuh kupoh syiah dilee
Kutueng keu kee meuh dum nyang na

Kianoh riwang u meunasah
Teungku syiah jijak mita
Lanja jiek u meunasah
Peudeueng pantah jisuet sigra

Jikeumeung cang teungku syiah
Neukheun pantah meunoe haba
He Kianoh bek poh ulon
Meuh sikeulian han lon hawa

Kianoh kheun peue tapeugah
Meung kee kujak kueh hana hawa
'Oh kujak kueh ban malam nyoe
Singoh uroe kaboh dawa

Kianoh beungeh muka mirah
Jitob syiah mate pana
Kianoh tob bak ulee hate
Syiah mate hilang nyawa

Keunong kutika roh that watee
Han saboh thee manusia
Syiah jitob han saboh thee
Reumbang watee jroh kutika

Akhe jameun teuma meugah
Kianoh dasyah ka jeuet keu raja
Han hase le dudoe meugah
Kianoh limpah keurajeuen raya

Mate syiah bak malam nyan
Jikueh yoh nyan meuh dum nyang na
Jijok keu raja meuh nam geudong
Beuna bek mate geupoh keu bila

Jijokkeuh meuh ban nyang napsu
Hingga meusyehuhu troh bak raja
Teuma geubri mideuen Kianoh
Teumpat makruh meuneuen raja

Yoh nyan Kianoh kaya limpah
Meuh barollah jibri dum na
Di sinan ka teutap keudiaman
Kianoh yoh nyan kaya raya

Areutajih le rakyat meukatoe
Jiprang nanggroe hana reuda
Seun sigampong seun sinanggroe
Teuma dudoe jiprang raja

'Oh habeh talo nanggroe jiprang
Dudoe jiriwang jiprang raja
Raja pi talo nanggroe pi jitueng
Habeh jibulueng bandum rata

Teutap jitueng keu jih nanggroe
Jipeugot meuligoe saboh nyang raya
Jipeugot meuh pirak teuupam
Luah didalam siteuntang mata

Luah didalam saboh peureusah
Meunan peuneugah dalam calitra
Meuligoe nyan that bit indah
Meuh meutatah meupeureumata

Ban siseun lingka jiboh keu kiieng
Hana bandeng indah rupa
Jipeuduek di ateueh peuratah meuh
Cahya peungeuh sigala donya

Minyeuk daiton jipasoe didalam
Geunab malam peungeuh lingka
Meunankeuh buet raja Kianoh
Meuh that damoh laju teuka

Deureuham jipeugot siploh mah brat
Meunankeuh buet silayeue jih raja
Deureuham nyang dilee habeh jiboh
Han le meung saboh jeueb-jeueb banda

Raja Kianoh meuh jih le that
Lurong halarat ateueh donya
Minyeuk daiton jipasoe lam kande
Raja jahe boh areuta

Dalam meuligoe geuta saboh
Meutatah jroh laloe mata
Buju linteung lapan ploah hah
Meuh meutatah meupeureumata

Di wie uneun keurusi meuh
Jiyue duek di ateuh nyang muda-muda
Jiyue duek aneuk uleebalang
Sajan dendayang jroh-jroh rupa

Uleebalang wadi meuntroe
Dum sinaroe sajan raja
Bandum di ulee kulah kama meuh
Cahya peungeuh hana tara

Kulah kama meuh ban peuet sagoe
Ban mata uroe limpah cahya
Na limong ploh aneuk miet sinan
Jroh lakuan ilok rupa

Aneuk bentara bandum sajan
Jibri peukayan bandum rata
Jibri peukayan ijo biru
Jroh that laku indah rupa

Peukayan ijo kuneng mirah
Hireuen dasyah pandang rupa
Wareuna peukayan le that bagoe
Tungkat di jaroe meupeureumata

Nibak tungkat meuh sinaroe
Intan pudoe jampu meutia
Na limong ploh aneuk miet nyan
Nam droe di sinan aneuk ulama

Nyang nam droe nyan jiboh keu wadi
Habeu jipike sicilaka
Jiboh keu wadi aneuk miet nam droe
Raja pindoe laen bicara

Habeu pike deungon khimat
Kaphe laknat saboh masa
Hajat jiyue kheun droejih tuhan
Kianoh nyan asoe nuraka

Meuka jikheun le aneuk miet nam droe
Laen sinaroe rijang sireuta
Meunan jipike dalam hate
Teutapi cre aneuk ulama

Aneuk miet nam droe dum jiboh droe
Raja pindoe balek agama
Meunan pike raja pindoe
Aneuk miet nam droe tupeue basa

Pat nyang jiduek raja pindoe
Aneuk miet nam droe jarak hana
Aneuk miet nam hana jithee
Laen lagee pike raja

Raja Kianoh nyan jikaphe
Aneuk miet nam cre saboh masa
Bak masa nyan hana tom cre
Meung sipade deungon raja

Di wie lhee dro uneun lhee droe
Han siuroe nyang han sireuta
Raja Kianoh wahamjih meunan
Aneuk miet nam jeuet ban kata
Jeuet ban jikheun jikira dudoe
Jiyue kheun droe Allah Ta'ala
Jibri peukayan meuh ngon pirak
Pandang galak soe eu rupa

Pat nyang jiduek ho nyang jijak
Hantom jarak aneuk ulama
Lhee droe di uneun lhee droe di wie
Hantom meusie ban jiaja

Nyang lhee droe di wie jimat cicem
Meunan kayem rok-rok masa
Nyang lhee droe nyan jimat peunuman
Didalam nyan klumbak jeumpa

Cicem utoh that bit raghoe
Jitupeue keudroe 'oh jibasa

'Oh ka jiglib jitupeue le
 Klumbak hase dalam piala
 Klumbak hase dalam peunuman
 Teureubang cicem nyan pantah sigra
 Jime ie mawo saboh peunuman
 Beuranggajan geunab masa
 Minyeuk ata saboh peunuman
 Nyan pi meunan jeueb kutika
 Klumbak jeumpa saboh peunuman
 Neungui raja nyan got jiaja
 Peunuman meuh deungon intan
 Meuteurapan mupeureumata
 Teuma jipeulheueh cicem di jaroe
 Sit that raghoe guna biasa
 Jiteureubang dalam peunuman
 Lheueh cicem nyan maseng jeumba
 Nibak ie mawo saboh jibloh
 Cicem utoh got jiaja
 Bak minyeuek ata saboh jidong
 Tahe mantong soe eu rupa
 Bak klumbak saboh jidong
 Rakyat teuceungong kalon rupa
 Bak klumbak saboh jidong
 Dum teuceungong rakyat nyang na
 Hingga rata bulee basah
 Teureubang pantah ateueh raja
 Jikeupak sayeueb hitam mirah
 Meuhambo basah ie ateueh raja
 Lheueh nyan cicem maseng jiwoe
 Bak teumpat droe aneuk miet tiga
 Lhee peunuman mantong asoe
 Aneuk miet lhee droe woe bak raja
 Le that nekmat raja pindoe
 Meuribee bagoie sit dum peue na

Peue jipinta sit troh rijang
 Cicem teureubang jipeuhamba
 Ka neulurong uleh Tuhan
 Jeuet keu teelan binatang nyang na
 Sigala binatang sinan meukawan
 Lurong Tuhan sicilaka
 Jeuet ban jikheun cit troh hajat
 Lurong halarat ateueh donya
 Raja Kianoh that bit meugah
 Lurong Allah dalam donya
 Le that nanggroe taklok bak jih
 Uso habeh keunan teuka
 Peue nyang jikheun dum peue hase
 Raja jahe asoe nuraka
 Habeh taklok bak jih muwoe
 Teuma jikheun droe Allah Ta'ala
 Umu lhee ploh thon keurajaan
 Lurong Tuhan ateueh donya
 Hana Kianoh hana habeh
 Meung silapeh di sinoe na
 Haba Kianoh le that lanjot
 Lon boh bacut meung keu punca
 Loncok punca ninan sipatah
 Meung lon kisah haba EELIA
 Haba EELIA asai di sinoe
 Nyankeuh jeuet nyoe lon cok punca
 Dilee pi le raja nyang laen
 Miseue Peura'un meugah raya
 'Oh lheueh Peura 'un meugah Karon
 Meuh jitamon han ek hingga
 Miseue meugah Nameurut dengon 'At
 Bandum laknat darohaka
 Han tom saket kaphe pindoe
 Jiyue kheun droe Allah Ta'ala

Han cit sabe Kianoh sidroe
 Meuribee bagoe dijih bicara
 Padum lawet jikeurajeuen
 Han tom reuen-mareuen keu jih teuka
 Han tom saket pi meung ulee
 Han tom layee meung ie muka
 Sit meung batok dijih pi tan
 Lurong Tuhan sicilaka
 Han tom mumang pi meung siblet
 Han tom saket sikleb mata
 Han tom timoh pi meung kude
 Raja kaphe nikmat lam donya
 Jiyue kheun droe jih poteu Allah
 Rakyat jikrah sigala donya
 Jikrah rakyat jeueb-jeueb nanggroe
 Jiyue kheun droe Allah Ta'ala
 Soe nyang pateh jih nyo tuhan
 Jibri peukayan ngon areuta
 Soe han pateh jipoh mate
 That bit jahe sicilaka
 Umu lhee ploh thon teutap keurajeuen
 Han tom reuen-mareuen keujih teuka
 Lheueh nibak nyan teuma dudoe
 Raja pindoe rab binasa
 Teukeudirollah teuma dudoe
 Aneuk miet nam droe keumeung poh raja
 Aneuk miet nam droe jikeheundak bunuh
 Raja Kianoh rab binasa
 Adat kon troh sidroe meuntroe
 Raja pindoe ka binasa
 Aneuk miet nam droe meucukeh-cukeh
 Teuma han jadeh jipoh raja
 Teuma teupike dalam hate droe
 Kadang na soe teuma poh bila

Raja pi tan geutanyoe pi mate
 Meunan pike maseng rata
 Tadeungo lon peugah sidroe meuntroe
 Ureung nyan toe deungon raja
 Meuntroe peugah bak Kianoh
 Gata jimeung poh le aneuk ulama
 Jimupakat jih nyan nam droe
 Gata sidroe jipupana
 Jikheun gata kaphe pindoe
 Tayue kheun droe Allah Ta'ala
 Ampon tuanku cahi meudeelat
 Lon peungat doli sroepada
 Jikheun jipoh raja Parisi
 That jideungki tuanku gata
 Jikheun jipoh tuanku beumate
 Jikheun kaphe keu doli sroepada
 Meuntroe peugah jihareutoe
 Aneuk miet nam droe siat hana
 Siat leupah aneuk miet nam droe
 Jihareutoe le bak raja
 Aneuk miet nam droe leupah jak manoe
 Meutroe peurunoe raja cilaka
 Ban jideungo meuntroe peugah
 Raja gundah pucat muka
 Pucat ngon muka yo ngon badan
 Rhet le yoh nyan ateueh geuta
 Kulah kama rhet di ulee
 Kakeuh layee ngon ie muka
 Sit nyan phon hate gundah
 Teuka sosah raja cilaka
 Hate gundah muka hiram
 Yoh nyan jidam aneuk ulama
 Yoh nyan jiyue poh aneuk nam droe
 Bak peudana meuntroe ngon peutua

A m m a b a k d u teuma dudoe
Aneuk miet nam droe lon kheun nama
Deungo lon peugah aneuk miet nam droe
Jroh samlakoe kunangan raja
Dilee untong jih keunangan
Wadi geupeunan 'oh ka raya

Nama nyang phon nan TAMLEKHA
Nyan nyang bijak nibak nyang na
Nyang keudua beutaturi
Nan geurasi MAKEUSALEMINA

MAREUTUNIH nama nyang keulhee
Meunan meuteuntee dalam calitra
Ashabul yamin nyan geupeunan
Kunangan nyan uneun raja

Nama nyang keu peuet NUNUNIH
SAREUBUNIH nyang keulima
PALIA SEUTATIUNIH nama nyang keunam
Habeu tamam lon peunyata

Ashabusy syimal nyan geupeunan
Di wie raja nyan aneuk miet tiga
Di wie lhee droe di uneun lhee droe
Raja pindoe sangat kaya

Lhee droe di wie lhee dore di uneun
Raja hireuen pucat muka
Keureuna bunoe meuntroe peugah
Nyankeuh gundah hate raja

Hiram muka yoh masa nyan
'Oh troh kunangan kalon raja
Masa dilee hana meunan
Bak uroe nyan beungeh raja

Kunangan kalon muka ubah
Raja gundah hate lam dada
Yoh nyan Tamlekha ka teupike
Ka meucawe dalam dada

Na soe peugah narit geutanyoe
Nyankeuh jinoe beungeh raja
Nyang dilee kon han tom meunoe
Nyo uroe nyoe ureueng peuhaba
Saleh soe deungo pakat geutanyoe
Han tom meunoe dilee nyang ka
Raja beungeh 'oh troh geutanyoe
Nyo na bunoe ureueng peuhaba
Yoh nyan Tamlekha lom teupike
Han jeuet dong le sinoe bak raja
Adat nyang raja nyoe tuhan
Pakon ban insan dum peukara
Makeuen minom ban di kamoe
Hana sapeue nyang na bida
Dum peukara ban di kamoe
Nyo raja nyoe manusia
Sipheuet tuhan hana meunan
Teutapi han jijeuet kata
Meung jikheun kon jipoh mate
Raja kaphe laknat raya
Meung soe kheun kon raja nyoe tuhan
Jikoh badan teuma jisula
Uroe malam dawok neupike
Sosahkeuh hate aneuk ulama
Makeuen pi tan minom pi han
Eh pi meunan dum peue hana
Han le jikira keu peukayan
Teumanyong yoh nyan Makeusalemina
He Tamlekha pakon gundah
Bak lon tapeugah he syeedara
Geutanyoe nam droe hukom saboh
Peugah adoe jroh peue keureuna
Teuma seutot muda samlakoe
Kupike keu droe he syeedara

Langet manyang tumpang jih tan
Kon nyan tuhan nyang meurupa

Langet meugantung lon kalon hireuen
Uroe ngon buleuen soe puba-ba
Soe hue buleuen soe boh bintang
Peungeuh bandrang soe boh cahya

Bumoe teuleueng hana mumot-mot
Pakri han hanyot buket nyang na
Meunan teupike lon he adoe
Nyang bumoe nyoe pat geuhanta

Bumoe teuduek sapat ngon laot
Pakri han hanyot soe peulara
Jinoe lon pike that teumakot
'Oh jan seupot uroe ho geuba

Lom teupike keuntong droe
Yoh cut kamoe lam kandong ma
Yoh masa lon dalam kandongan
Pane keunan raseuki teuka

Soe peugot ban jinoe tuboh
Pane utoh keunan teuka
Meung raja nyan jeuet jih pi tan
Pakri tuhan droe jikata

Pakri jiyue kheun droe jih tuhan
Utoh jih tan dum peukara
Cuba pike dumteu jinoe
Nyo raja nyoe nyang peulara

Jih pi saban deungon geutanyoe
Pakri jinoe toh bicara
Tuhan geutanyoe hana lakuan
Hana saban mee tapeusa

Hana jaroe hana gaki
Maha suci Allah Ta'ala
Raja nyoe kaphe laknatellah
Beuthat jipeugah gajah guda

Beuthat jikheun bek tapateh
 Raja paleh asoe nuraka
 Raja paleh kaphe pindoe
 Han thee keudroe jih gob peuna
 Patot jiyue kheun droejih Tuhan
 Imanjih tan kaphe cilaka
 Raja Kianoh lurong Allah
 Page balah dijih nuraka
 Rakan deungo Tamlekha peugah
 Dum geukeubah didalam dada
 Rakan nyang limong jaweueb yoh nyan
 Sabet meunan ban kheun gata
 Sabet beuna ban tapeugah
 Hana salah ban takata
 Kamoe nyang limong bicara tan
 Bandum sajan keu ngon gata
 Ban nyang takheun han mubantah
 Ban tapeugah meuseureuta
 Meung nyo taikot raja laknat
 Hana rahmat geutanyoe dum na
 Meung nyo tapeugah raja nyoe Tuhan
 Geutanyoe sajan dalam nuraka
 Tuhan bri adeueb page dudoe
 Geutanyoe nam droe sajan raja
 Tamlekha kheun yoh nyan pantah
 Hana ilah meung kon tabungka
 Meung kon tabungka geutanyoe nam droe
 Beujioh nanggroe jinoe tasapa
 Meung nyo taduek sinoe sabe
 Han meujan mate jienanya
 Na soe deungo pakat geutanyoe
 Raja pindoe hiram muka
 Pakat geutanyoe na soe peugah
 Meunan ulah bangon rupa

Hantom meunoe nyang ka dilee
 Geu-eu keu kee meunan rupa
 Pakat geutanyoe na soe peuthee
 Nyankeuh layee ngon ie muka
 Nyankeuh lon kheun han jeuet dong le
 Akhe mate jienanya
 Tacre nibak raja syeetan
 Tawoe bak Tuhan Rabbon Sama
 Tuhan nyang peujeuet langet bumoe
 Keunan geutanyoe he syeedara
 Meunyo mupakat geutanyoe nam droe
 Tacre jinoe he adekeunda
 Akhe meugah kadang dudoe
 Ureung nam droe jadeh bungka
 Tamlekha publoe kayee sibak
 Keupangkai jak laen hana
 Lhee boh deureuham nanggroe Parisi
 Buet Kianoh peugot ria
 Siploh mah brat saboh-saboh
 Keurajeuen Kianoh jiyue peuraja
 Nyankeuh pangkai nyang na meuteumee
 Sibak kayee jitueng haruga
 'Oh sare lheureh kayee jipubloe
 Beudoh samlakoe pasang guda
 Yoh nyan jibungka ureueng nam droe
 Jiboh nanggroe ka jisapa
 Jiboh peulana teubiet u blang
 Guda jipasang dumjih rata
 Ka jiboh ngon taloe keukang
 Yoh nyan jipasang guda poh lawa
 Ka jiteubiet ureueng nam droe
 Raja pindo jithee hana
 Hana jithee kunangan plueng
 Leupah jurong meudiwana

Teuma meututo sidroe rakan
Bek le teelan tapasang guda
Takeubah guda tajak ngon tapak
Tiek le galak areuta raja
Yoh nyan mupakat ureueng nam droe
Jitren u bumoe dumjih rata
Guda nam boh sinan jikeubah
Jicok langkah ka jibungka
Tujoh peureusah jioh jijak
Beusot tapak darah keulua
Seubab han tom peujalanan
Ngon seubab nyan jeuet binasa
Teukeudirollah peurintah halarat
Meuteumeung ngon sabat di rot raya
Meuteumee sidroe ureueng di jalan
Teukeudi Tuhan nyang that kaya
Ureueng tueng upah geubeue kameng
Hate heuneng suci sapha
Jiduek di gle tueng upahan
Nyankeuh rakan nyang seutia
Neubri saleuem ureueng nam droe
Ka troh kamoe keunoe bak gata
Assalamu 'alaikom dalem meutuah
Peurintah Allah meuteumee ngon gata
Kamoe dalem apoh-apah
That sangat grah lapa dahaga
Makanan pitan minoman pi han
Peue na rakan jinoe bak gata
Kri cit narit sigeubeue kameng
Hate heuneng geumaseh raya
Jibri ie abin keu minoman
Jibri makanan jabet keureuma
Ureueng nam droe pajoh makanan
Nekmat yoh nyan jati rasa

Jipajoh pi lheueh nekmah hase
Uroe nyan le teuka sinja

Bak malam nyan teutap sinan
Jibri makanan peue hase na
Nibak malam peugah meupeugah
Pane langkah droeneuh teuka

Pane gampong di pat teumpat
Peugah sabat ho jak gata
Ulon kalon gata rakan
Sang lakuan kunangan raja

Pane tajak ho meuhajat
Peugah sabat deungon sibeuna
Pane gata wahe rakan
Lon eu peukayan bak anggeeta

Ngon peukayan le bak asoe
Saleh ho nanggroe tameung bungka
Saleh peue seubab taboh nanggroe
Peue na adoe peugah sigra

Peue na seubab taboh keurajeuen
Peue reuen-mareuen saleh teuka
Peugah bak kamoe adoe meutuah
Takheun beusah adoe raja

Ureueng nam droe teuma peugah
Habeu jikisah asai bungka
Nyang jeuet meucra kamoe nam droe
Tadeungo jinoo lon calitra

Kamoe nyoe rakan raja Kianoh
Nyo bit saheh kunangan raja
Nyang jeuet muminah kamoe di nanggroe
Raja pindoe tan agama

Raja Kianoh ka jikaphe
Han jeuet dong le kamoe di tangga
ka jiyue kheun droe jih tuhan
Raja syeetan asoe nuraka

Jikkeun droejih poteu Allah
Nyankeuh sosah kamoe dum na
Soe han pateh jipoh mate
Raja kaphe laknat raya

Jiyue seumbah droejih bak kamoe
Muplueng kamoe nyan baroe sa
Nyankeuh punca meuboh nanggroe
Kamoe nam droe meuteumee ngon gata

Meudong di nanggroe baya keunong
Bahle lam gunong meujak tapa
Nyankeuh seubab muboh gampong
Mita untong nyang sijahtra

Adat meunan wahe adoe
Lon nyoe sidroe sajan taba
Meung nyo meunan ban tapeugah
Dilon gundah hate lam dada

Lon pi han le kudong di nanggroe
Akhe dudoe jeuet binasa
Teuma tanyong ureueng nam droe
Namateuh soe geuhei gata

Soe nan geuhei gata sidroe
Peugah adoe bak kamoe nyang na
Ureueng duek di gle jihareutoe
Bak ureueng nam droe jicalitra

Ulonteu nyoe nyang meusyuehu
DAWNUANISU geurasi nama
Jinoe pi lon jak tapreh siat
Lon jak intat kameng syeedara

Lon jak pulang kameng rakan
Lon jak sajan deungon gata
Teuma jijak pantah rijang
Habeuh pulang dum areuta

'Oh troh keunan kameng pulang
Meu'ah abang lon kubungka

Kameng jipulang meu'ah jilakee
 Habeu jiteuntee dum peukara
 Kakeuh jijak ngon ureueng nam droe
 Jiboh nanggroe takot keu raja
 Tujoh ngon nyan nam droe dilee
 Jiseutot asee jeuet lapan ka
 Asee nyan jroh rupa le ban
 Beusalahan geukheun ulama
 Ladom ijo kuneng meujampu
 Ladom kheun laku mirah rupa
 Ladom riwayat wareuna langet
 Puteh meumet-met bangun rupa
 Sang ija soh ladom peugah
 Meunan ulah ladom rupa
 Rupa le ban nama le that
 Le riwayat khilah ulama
 Meunan teuseubut bak Kitab Arab
 Asee geuhisab le that nama
 Meunan peuneugah dalam nisabi
 Saidina Ali nyang calitra
 Neudeungo nibak Rasulullah
 Dudoe neupeugah bak panita
 Dudoe nibak wapheuet Nabi
 Tanyong Yahudi neupeuhaba
 Dudoe nibak nyan teuma geukisah
 Ibnu Abah nyang calitra
 Geuriwayat rupa asee
 Le ban lagee le peue nama
 Ibnu Abah neukheun yoh nyan
 Asee jimeunan Kateumi nama
 Si Kateumi jimeuhei nan
 Aseejih nyan sajan jiba
 Po asee nyan Daunuanisu
 Meunan teungku kheun ulama

Sit han tom cre jiba sajan
 Keumeung meukawan asee sireuta
 Di tuanteu Ali neuriwayat
 Asee nyan meuhat Diarah nama
 Si Diarah jimeuhei nan
 Daunuanisu nyan nyang peulara
 Nyan nan neukheun di tuanteu Ali
 Hana sabe khilah ulama
 Di'ldeura-i neukheun yoh nyan
 Asee jipeunan Kiteurab nama
 Si kiteurab jimeuhei nan
 Asee jih nyan got jiaja
 Di Ideurai kheun nyan nan asee
 Di Mujahet teuntee neukheun Sahia
 Si Sahia jimeuhei nan
 Aseejih nyan got jiaja
 Di Mujahet neukheun nyan nan
 Di Su'ib yoh nyan laen calitra
 Di Su'ib neukheun bak masa nyan
 Asee jipeunan a h m a nama
 Si Ahma jimeuhei nan
 Aseejih nyan mirah wareuna
 Di Su'ib meunan neupham
 Abeudolah Salam laen kata
 Abeudolah ben Salam yoh nyan neukheun
 Katirulabila geurasi nama
 Si Labila jimeuhei nan
 Aseejih nyan bijaksana
 Abeudolah ben Salam neukheun nyan na
 Di Wahab yoh nyan laen calitra
 Di wahab neukheun yoh nyan
 Asee jipeunan Takat nama
 Si Takat Jimeuhei nan
 Aseejih nyan jigaseh raya

Di Wahab neukheun nyan nan
 Abu Hanifah yoh nyan laen calitra
 Di Abu Hanifah neukheun yoh nyan
 Asee jipeunan Kitamun nama
 Si Kitamun jimeuhei nan
 Aseejih nyan ceureudek raya
 Abu Hanifah neukheun nyan nan
 Ulama laen lom khilah
 Nama le that rupa le ban
 Meunan teelan dalam calitra
 Si Kateumi ladom kheun nan
 Aseejih nyan ijo wareuna
 Han ek habeh soe keutahwi
 Malingkan Rabbi thee sibeuna
 Kata Muhammad ibnu Mayet
 Asee nyan sabet lheueh nyan nama
 'Oh watee lheueh jimeuhei nan
 Aseejih nyan kuneng wareuna
 Ahli tapeuse le that khilah
 Teutapi Allah thee sibeuna
 Nyang riwayat ibnu Abah
 Si Kateumi sah neukheun nama
 Si Kateumi seutot di likot
 Ureueng peudhot pura-pura
 Jijakkeuh ureueng nyan tujuh droe
 Asee sidroe sajan jiba
 Ureueng dilee asee di likot
 Teuma jidhot pura-pura
 Tamlikha kheun nyan bak rakan
 Kateumi sajan nyan bek taba
 Si Kateumi bek taba sajan
 'Ayeb teelan nyum di mata
 Sang-sang ayeb jih di likot
 Pakri patot rakan bak gata

Ureueng nam droe teuma seuot
Pakon tadhoh bahle sireuta
Ureueng po kheun teuma bacut
Bahle kadhoh nak jigisa

Kateumi deungo meunan geukheun kri
Lipah gaki pantah sigra
Jab ngon dada yoh nyan u bumoe
Sireuta jimoe ngon ie mata

Sireuta jiucap dua kalimah
Bek takeubah ulon taba
Yoh nyan jikheun *la ilaha illa l-lah,*
Nabi Musa kalamu l-lah

Kuek saksi paku Tuhan
Hana saban miseue hamba
Hana jaroe hana gaki
Maha suci Allah Ta'ala

Kuek saksi Musa nyo Nabi
Suroh Rabbi neyue keurija
Ulonteu nyoe bek tatinggai
Ulonteu kawai dum na gata

Kulakee do'a ubak Tuhan
Beukong iman teungku dum na
Lon lakee beuteutab gata tujuh droe
Raja pindoe bek jimita

Beuseulamat donya akhirat
Bek na sapat meuteumee baya
Beurangri baya pi bek keunong
Bak Tuhan peutamong dalam syeureuga

Ureueng tujuh droe jipujoe Tuhan
Jiba sajan u lam rimba
Ureueng tujuh droe lapan ngon ase
Meunan meuteuntee dalam calitra

Ureueng tujuh droe teungoh u gle
Meuteumee le saboh guha

Di sinan meuteumee guha batee
 Got that lagee indah rupa
 Jabal *Kuluh* nama gle nyan
Ramet jimeunan nama guha
 Guha that jroh meupalinggam
 Krueng didalam ie meumata
 Pinto guha ubit langgam
 Luah didalam siteuntang mata
 Dalam guha yoh masa nyan
 Le that di sinan jabet keureuma
 Padum-padum ngon bak kayee
 Nyang mangat bee Gahru ceundana
 Jabet keureuma masak di bak
 Tapajoh galak jati rasa
 Masak di bak rhet bak tangke
 Tapajoh le ban nyang hawa
 Dalam tapeuse meunan geupeugah
 Ibnu Abah po calitra
 Ureüeng tujuh droe pi troh keunan
 Geutamong yoh nyan bandum rata
 Asee di lua dijih teumpat
 Jikeumiet meuhat pinto guha
 Si Kateumi keumiet pinto
 Ureueng lalo dum jisangga
 Uroe malam teugunci tan
 Beuranggajan jimeujaga
 Jikeumiet pinto dijih laloe
 Ureueng tujuh droe teutap lam guha
 A m m a b a k d u teuma dudoe
 Ureüeng tujuh droe pansan lam guha
 Bak'Ideura-i peureuman Tuhan
 Neuyue tren yoh nyan u lam donya
 He' Ideura-i katren lam gunong
 Kajak tueng nyawong asoe guha

Kajak tueng nyawong ureueng tujuh droe
 Raja pindoe balek agama
 'Ideura-i deungo peureuman Tuhan
 Geutren yoh nyan pantah sigra
 'Ideura-i tren dalam gunong
 Neujak tueng nyawong asoe guha
 Neujak tueng nyawong ureueng tujuh droe
 Raja pindoe bek jisula
 'Ideura-i tren dalam guha nyan
 Ureueng tujuh droe sinan pana
 Si Kateumi kawai pinto
 Deungon kheundak po Tuhan Asa
 Jiek di pinto sinan sabe
 Deuekjih han le grah pi hana
 Hana jiwéh asee di sinan
 Peurintah Tuhan Nyang Kuasa
 Ureueng tujuh droe sinan pansan
 Peureuman Tuhan Nyang Kuasa
 Tuhan yue tren asoe langet
 Peulara manyet dalam guha
 Sidroe-droe manyet dua ploh malaikat
 Tuhan halarat yue peulara
 Jibalek wie deungon uneun
 Sithon siseun meunan keurija
 Sithon siseun manyet jibalek
 Bek kamoe ek bak anggeeta
 Sit jeueb-jeueb thon meunan suntok
 Nak meung bek brok tuboh mulia
 'Oh troh-troh bak buleuen Mehram
 Di sinan tapham tuboh meugisa
 Siploh uroe buleuen Mehram
 Sinan gata pham nan Asyura
 Bak buluen Mehram siploh uroe
 Manyet tujuh droe malaikat gisa

Mata uroe Tuhan suroh
 Neuyue peutroh dalam guha
 Nak tho tuboh bek brok jasad
 Suroh halarat keupadanya
 Jiek uroe nyan u langet
 Di uneun manyet keunong cahya
 Jilob uroe blah wie keunong
 Ateueh gunong dalam guha
 Ashabon Kahphi teuduek siat
 Meuwoe riwayat ubak raja
 K a t a s a h e b po karangan
 Teumanyong yoh nyan raja cilaka
 Ka jiteubiet yoh masa nyan
 Jieü kunangan teuka hana
 Aneuk miet nam droe ho ka leupah
 Cuba peugah ho jibungka
 Seuot rakyat tandi bujang
 Keunan u blang nyan jisapa
 Keunankeuh bunoe kamoe pandang
 Jiteubiet u blang pasang guda
 Troh 'an jinoe hana jiwoe
 Saleh ho nanggroe ka jibungka
 Keunankeuh rot bunoe u tunong
 Saleh lam gunong jijak tapa
 Jijak mita laen Tuhan
 Keu gata han jipeucaya
 Bak peunyum lon jiplueng leugat
 Lawet nyoe that dukacita
 Silawet neukheun droeneuh tuhan
 Aneuk miet nam dukacita
 Nyang dilee kon hana meunoe
 Ureueng nam droe jarak hana
 Hana tom cre aneuk miet nam droe
 Tuanku sidroe jigaseh raya

'Oh neukheun droeneuh poteu Allah
Nyan phon sosah aneuk ulama
Hana jipateh tuanku tuhan
Aneuk miet nam ka jibungka
Na nyum kamoe nyo ka jiplueng
Saleh lam gunong jijak tapa
Meuri jijak hana jiwoe
Aneuk miet nam droe ho saleh ka
Meukeumeung tham mupoh mate
Teutob hate kamoe dum na
Hana meugrak gaki jaroe
Aneuk miet nam droe leupah bungka
Jipasang guda aneuk miet nam droe
Rakyat meukatoe kalon rupa
Bit pi meunan han soe tanyong
Tahe mantong hana haba
Ban raja deungo meunan peuneugah
Rakyat jikrah sigala donya
Jiyue jak mita aneuk miet nam droe
Ban saboh nanggroe jiseuranta
Lapan ploh ribee guda jibri
Kandran Parisi jak muemita
Jibri haba jeueb-jeueb nanggroe
Aneuk miet nam droe jiyue mita
Tujoh uroe jikrah rakyat
Habeh meusapat dum barang na
Tujoh uroe jikrah sabe
Rakyat ile jeueb-jeueb donya
Nyan teupike dum na rakyat
Musyawarat ban sineuna
Nyang jeuet jiplueng aneuk miet nam droe
Jiyue kheun droe Allah Ta'ala
Kon raja nyan poteu Allah
Nyankeuh sosah aneuk ulama

Jakalee nyo raja nyoe tuhan
Aneuk miet ban nam han jibungka

Hana patot jiwéh sinan
Aneukmiet ban nam aneuk ulama
Meunan teupike dum bak hate
Hana lahe nyan jikata

Jikheun kon tuhan hana lahe
Jitakot mate jipoh le raja
Le that rakyat meunan pike
Raja kaphe jiboh agama

Siteungoh rakyat nyan bak hate
'Oh jipike gadoh bicara
Han jeuet kheun nyo han jeuet kheun kon
Seubab jikalon dum peukara

Pakri raja nyoe saleh tuhan
Saleh cit kon bak geukira
Peukeuh seubab nyan jeuet meunan
Ileumee han didalam dada

Yoh masa nyan jaheliah
Ubah-ubah nibak agama
Meujan-jan nyo meujan-jan kon
'Oh jikalon dum peukara

Le that rakyat han troh pike
Han meu'oh le sok-sok sangka
Siteungoh kheun nyo siteungoh kheun kon
Meunan bangon rakyat dum na

Jaheliah 'etikeuet le ban
Makriphat keu Tuhan ileumee hana
Han jitu'oh keu makriphat
Ileumee singkat dalam dada

Le that rakyat yoh nyan kaphe
Ladom meung lahe jiseureuta
Saboh bangon jitakot meung lahe
Jiniet bak hate asoe nuraka

Jikeumeung kheun kon han mupakat
Le that rakyat raja cilaka
Le nyang taklok rakyat keunan
Ngon seubab nyan han jeuet jikata
Joh nyan rakyat habeh meusapat
Jibungka leugat han jeuet meudawa
Jiyue mita aneuk miet nam droe
Rakyat meukatoe yoh nyan bungka
Lapan ploh ribee guda jibri
Kandran Parisi jak meumita
Jiseutot euncit masa jijak
Beukah tapak giduek guda
Hingga troh bak saboh gunong
Rakyat jitamong dalam rimba
Rakyat pi troh dalam gunong
Meuteumeung sinan saboh guha
Jipuwéh asee yoh masa nyan
Jitamong keunan rakyat dum na
Yoh masa nyan teumakot asee
Jieu meuree-ree rakyat teuka
Jiminah asee sinan siat
Jipeurab rakyat u pinto guha
Jipreh di lua ladom rakyat
Ladom leugat tamong lam guha
Nyang preh di lua that barollah
Jaheliah tamong lam guha
Jaheliah na taturi
Niet bak hate sok-sok sangka
Raja pi kon jimeuniet tuhan
Laen pi meunan sok-sok sangka
Nyankeuh ureueng jaheliah
Makriphat keu Allah ileumee hana
Jaheliah tamong keunan
Lam guha nyan dumjih rata

'Oh sare leupah jitamong keunan
 Jieu ureueng nyan teungeut indra
 Neupeutren ileuham uleh Allah
 Jaheliah got that bicara
 Neubri ileuham ubak hate
 Sit leumah le akai bicara
 Jaheliah habeh mupakat
 Tapeungeut rakyat euntreuk di lua
 Rakyat di lua euntreuk tapeungeut
 Ureueng nyan teungeut takheun hana
 Hana meuteumeung aneuk miet nam droe
 Saleh ho nanggroe ka jibungka
 Beumupakat dum geutanyoe
 Aneuk miet nam droe takheun hana
 Saleh habeh ka rimueng plah
 Meunan tapeugah euntreuk u lua
 Aneuk miet nam droe han meuho le
 Saleh ka mate dalam rimba
 Meunan pakat dum geutanyoe
 Udeh jinoe teubiet u lua
 Meung kon meunan tapeungeut rakyat
 Jipoh meuh at asoe guha
 Jipoh le raja aneuk miet nam droe
 'Oh troh u nanggroe teuma jisula
 Habeh bandum jipoh mate
 Raja jahe laknat raya
 Jitet manyet jiboh lam apui
 Tutong rangui adeueb seksa
 Jaheliah marit keudroe-droe
 Aneuk miet nam droe jisangka indra
 Jisangka teungeut aneuk miet nam droe
 Hana jipeugoe dumjih rata
 Pakri jeuet jikheun aneuk miet nam droe
 Tujoh lagoe sapat lam guha

Jikeumeung kheun kon han mupakat
Le that rakyat raja cilaka
Le nyang taklok rakyat keunan
Ngon seubab nyan han jeuet jikata
Joh nyan rakyat habeh meusapat
Jibungka leugat han jeuet meudawa
Jiyue mita aneuk miet nam droe
Rakyat meukatoe yoh nyan bungka
Lapan ploh ribee guda jibri
Kandran Parisi jak meumita
Jiseutot euncit masa jijak
Beukah tapak giduek guda
Hingga troh bak saboh gunong
Rakyat jitamong dalam rimba
Rakyat pi troh dalam gunong
Meuteumeung sinan saboh guha
Jipuwéh asee yoh masa nyan
Jitamong keunan rakyat dum na
Yoh masa nyan teumakot asee
Jieu meuree-ree rakyat teuka
Jiminah asee sinan siat
Jipeurab rakyat u pinto guha
Jipreh di lua ladom rakyat
Ladom leugat tamong lam guha
Nyang preh di lua that barollah
Jaheliah tamong lam guha
Jaheliah na taturi
Niet bak hate sok-sok sangka
Raja pi kon jimeuniet tuhan
Laen pi meunan sok-sok sangka
Nyankeuh ureueng jaheliah
Makriphat keu Allah ileumee hana
Jaheliah tamong keunan
Lam guha nyan dumjih rata

'Oh sare leupah jitamong keunan
 Jieu ureueng nyan teungeut indra
 Neupeutren ileuham uleh Allah
 Jaheliah got that bicara
 Neubri ileuham ubak hate
 Sit leumah le akai bicara
 Jaheliah habeh mupakat
 Tapeungeut rakyat euntreuk di lua
 Rakyat di lua euntreuk tapeungeut
 Ureueng nyan teungeut takheun hana
 Hana meuteumeung aneuk miet nam droe
 Saleh ho nanggroe ka jibungka
 Beumupakat dum geutanyoe
 Aneuk miet nam droe takheun hana
 Saleh habeh ka rimueng plah
 Meunan tapeugah euntreuk u lua
 Aneuk miet nam droe han meuho le
 Saleh ka mate dalam rimba
 Meunan pakat dum geutanyoe
 Udeh jinoe teubiet u lua
 Meung kon meunan tapeungeut rakyat
 Jipoh meuh at asoe guha
 Jipoh le raja aneuk miet nam droe
 'Oh troh u nanggroe teuma jisula
 Habeh bandum jipoh mate
 Raja jahe laknat raya
 Jitet manyet jiboh lam apui
 Tutong rangui adeueb seksa
 Jaheliah marit keudroe-droe
 Aneuk miet nam droe jisangka indra
 Jisangka teungeut aneuk miet nam droe
 Hana jipeugoe dumjih rata
 Pakri jeuet jikheun aneuk miet nam droe
 Tujuh lagoe sapat lam guha

Teuma jiseuot sidroe rakan
Meuteumeung di jalan kadang jiba
jaheliah keumah pakat
Jiteubiet leugat dum u lua

Jitakot 'oh jaga habeh teukeujot
Plueng teumakot nyan u lua
Teuma jidrob uleh rakyat
Jiba leugat ubak raja

Nyankeuh seubab han jipeugoe
Teubiet sinaroe dum u lua
Jaheliah teubiet leugat
Jipeungeut rakyat nyang di lua

Hana meuteumee aneuk miet nam droe
Udeh tawoe geutanyoe dum na
Saleh ho-ho nyan ka jiplueng
Saleh rimueng pajoh dum na

Saleh peue gunong nyan ka mate
Bek tadong le tawoe bak raja
Rakyat di lua deungo hareutoe
Habeh jiwoe dumjih rata

Troh bak raja rakyat jiwoe
Aneuk miet nam droe jikheun hana
Hana meuteumee aneuk miet nam droe
Saleh ho nanggroe ka jibungka

Deelat tuanku han meuho le
Saleh ka mate dalam rimba
Jeueb-jeueb seurokan tan meuteumeung
Nyankeuh ureueng meujak mita

Saleh peue gunong nyan ka jiplueng
Saleh cit rimueng gajah seuba
Udeb mate hana meukusuh
Raja Kianoh han le haba

Padum lawet han soe teuoh
Kakeuh gadoh han soe jak mita

Hingga mate raja Kianoh
 Ureueng tujuh droe teutap lam guha
 Raja laknat mate ka treb
 Yoh nyan udeb asoe guha
 K a t a s a h e b po riwayat
 Udeb meuh at asoe guha
 Lhee reutoh thon ngon sikureueng
 Han tom ureueng keunan teuka
 Padum-padum raja meugantoe
 Ureueng tujuh droe goh lom jaga
 Meunan teuseubot dalam Kuruan
 Peureuman Tuhan Nyang Mulia
 Le that raja laen meugantoe
 Ureueng tujuh droe goh lom jaga
 Silayeye keurajeuen Abeudorahman
 Yoh masa nyan udeb rata
 Nabi Isa u langet ka treb
 Baro udeb asoe guha
 Keurajeuen Isa lam nanggroe nyoe
 Ureueng tujuh droe teungeut indra
 Nabi Isa mekreuet u langet
 Mantong teungeut asoe guha
 Raja Jomjomah mate lom sidroe
 Ureueng tujuh droe goh lom jaga
 Nabi Isa neumekreuet ka treb
 Baro udeb ureueng lam guha
 Masa keurajeuen Abeudorahman
 Yoh masa nyankeuh phon jaga
 Tuhan peudeb ureueng tujuh droe
 Nyawong neupuwoe nibak angeeta
 Karonya Tuhan nyawong neuboh
 Sigo ban tujuh siseun jaga
 Iradat Tuhan meuleuha kudrat
 Kuasa that Allah Ta'ala

K a t a s a h e b po riwayat
 Teduek le meuh at asoe guha
 'Oh ban jikalon mata uroe
 Tahe keudroe sipeunganja
 Mata uroe jieu ka manyang
 Yoh nyan teuceungang bandum rata
 Na sigalah mata uroe
 Marit sidroe nyang peutua
 Nama geuhei nan Tamlekha
 Sangat bijak nibak nyang na
 Tamlekha kheun yoh nyan bak rakan
 Tuwo keu Tuhan teungeut Indra
 Simalam suntok taeh seunang
 Keu seumbahyang hana takira
 Na sikeujab lheueh jikheun nyan
 Beudoh sinan punyo mata
 Jijak uneun jijak uwie
 Jimita ie hana sapat na
 Krueng habeh tho kayee mate
 Onjih han le tingai baknya
 Cabeueng ka brok bak treuk tinggai
 Hireuen akai ngon bicara
 Bak pi ka brok cabeueng han le
 Gadoh pike geutanyoe dum na
 Pruetteu pi deuek lagi ngon grah
 Pakri ilah ngon bicara
 Jabet keureuma han le meung bak
 Bukon that deuek geutanyoe dum na
 Ie han sapat makanan tan
 Bak soe rakan na beulanja
 Seuot Tamlekha tanyong rakan
 Bak lontuan na beulanja
 Tabri dalem keu lon peukayan
 Ija di badan alat meusapa

Tamlekha teubiet yoh nyan sidroe
 Rakan nam droe tinggai lam guha
 Teubiet lam guha jijak sidroe
 'Oh troh u nanggroe laloe mata
 Sira jijak tahe keudroe
 Jieu nanggroe kon ban nyang ka
 Rot han meuho peukan han mupat
 Hireuen jih that gadoh bicara
 Hana mupat le peukan sot
 Palang-palot ureueng muda
 Na sikeujab tahe hireuen
 Leumahkeuh mideuen jieu rupa
 Lalu jipeurab nyan bak pinto
 Di sinan tahe sipeunganja
 Meusurat kalimah bak pinto mideuen
 Yoh nyan hireuen ureueng muda
La ilaha illa l-lah, 'Isa ruhu l-lah
 Jibaca pantah kalimat mulia
 Nyan meusurat bak pinto mideuen
 Jikalon hireuen laloe mata
 Jikucueb babah muda samlakoe
 Dua jaroe rahob muka
 Na sikeujab teuma dudoe
 Ureueng lakoe keunan teuka
 Nyan Habaran geumeuhei nan
 Meuteumee yoh nyan di pinto raya
 Di pinto mideuen meuteumee sinan
 Ureueng lakoe nyan jijak lanja
 Tamlekha tanyong yoh masa nyan
 Hajat u peukan tren u banda
 Tamlekha deungo meunan hareutoe
 Ulonteu sidroe teungku neuba
 Neuba ulon teungku u peukan
 Lon jak sajan deungon gata

Habaran seuot insya Allah
Peue na salah jak udehta
Na sikeujab nyan beujalan
Troh u peukan ureueng dua

'Oh sare troh nyan u peukan
Geutamong sajan siseun dua
Tamlekha tanyong bak Habaran
Peue lakab nan nama banda

Peue nan mideuen teungku peugah
Soe khaliphah peue nan raja
Habaran peugah yoh masa nyan
Abeudorahman nama raja

Nama raja Abeudorahman
Kusuh geupeunan nama banda
Tamlekha deungo Habaran peugah
Hireuen dasyah hate lam dada

Tamlekha kheun yoh masa nyan
Tabloe makanan teungku le gata
Nyoe deureuham wahe teelan
Tabloe makanan keu kamoe hamba

Habaran kalon deureuham nyan
'Ajab yoh nyan akai bicara
Rayek deureuham siploh mah brat
Tahe rakyat ban sineuna

Habaran tanyong bak samlakoe
Pat he adoe tateumee peudeuna
Dilon ladom adoe meutuah
Meung han lon peugah ubak raja

Tamlekha seuot deumi Allah
Jimeusumpah kon peudeuna
Sibak kayee ulonteu publoe
Na lhee uroe bak lon kira

Ulonteu bungka di madinah
Hana kuscumbah raja cilaka

Keurajeuen Kianoh raja pindoe
 Na lhee uroe cre ngon hamba
 Habaran deungo Tamlekha peugah
 Bukon beurakah narit gata
 Hana patot takheun meunan
 Keureuna raja nyan ka treb pana
 Lhee reutoh thon ngon sikureueng
 Dumnan jameun sit ka lama
 Padum-padum raja meugantoe
 'Ajab that kamoe narit gata
 Teuma meusyehu didalam peukan
 Keudeungoran troh bak raja
 Meugah bak raja Abeudorahman
 Geupangge yoh nyan ureueng muda
 Geuba u dalam yoh masa nyan
 Rakyat sajan meuribee laksa
 Tamlekha pi troh yoh masa nyan
 Raja tanyong neupareksa
 Abeudorahman neuteamanyong
 Pane ureueng bunoe teuka
 Jaweueb bujang sabda Seulotan
 Meuteumee di peukan doli sroepada
 Meuteumee ngon kamoe tuanku bunoe
 Ureueng muda nyoe keunoe muba
 Meukalon bak jih deureuham jameun
 Meutanyong jikheun kon peudeuna
 Jikeumeung mubloe tuanku bunoe
 Bak peunyum kamoe nyo peudeuna
 Padum boh guci saleh jiteumee
 Tuanku lakee bak ureueng muda
 Tuanku lakee di geutanyoe ladom
 Meunan muphom adat nyang ka
 Patot tuanku teurimong bulueng
 Bagi limong miseue nyang ka

Saboh bagi milek janjongan
Nyang ka meunan hukom sroepada
Dijih han jitem peugah ban teupat
Salah nyan that teumeureuka
Raja tanyong yoh masa nyan
Bak ureueng nyan neupareksa
He ureueng muda takheun beusah
Cuba peugah nyang sibeuna
Tamlekha yoh nyan ka jingadu
Dilon tuanku hana peudeuna
Deelat tuanku syahi alam
Lhee boh deureuhan nyang na bak hamba
Sibak kayee ulonteu publoe
Baro lhee uroe bak lon kira
Ulon publoe kayee sibak
Lon plueng nibak raja cilaka
Seulotan Kianoh raja Parisi
Jimeuungki keu agama
Jiyue kheun droejih poteu Allah
Soe han seumbah habeh jisula
Manyet jitot dalam apui
Tuboh rangui jeuet keu baja
Manankeuh buet raja Kianoh
Rakyat jibunoh ban sineuna
Teukeudirollah meuleuha kudrat
Muplueng leugat dalam rimba
Jabaj Kuluh nama gle nyan
Ramet jimeunan nama guha
Dalam guha nyan kamoe som droe
Baro lhee uroe kamoe kira
Na simalam teungeut di sinan
Jaga nibak nyan nyoe ho lon hala
Kamoe dum deuk makanan tan
Keulaparan hana tara

Ulon teubiet tinggai rakan
 Lon tren u peukan jak meumita
 Ulon jak keunoe mita makanan
 Tinggai rakan sideh lam guha
 Mideuen kusus tuanku kamoe
 Dalam nanggroe nyoe rumoh tangga
 Deelat tuanku seumbah laman
 Kamoe kunangan raja cilaka
 Jiyue kheun droejih poteu Allah
 Hana meuseumbah muplueng lam rimba
 Raja Kianoh bit that laknat
 Le that rakyat jienanya
 Jigeubeue kameng sijih nyan dilee
 Hana soe thee ka jeuet keu raja
 Ampon tuanku ulon teukeunai
 Meung na tinggai mantong tangga
 Ibnu Katen bapa lon sinoe
 Dalam nanggroe nyoe rab ngon raja
 Deelat tuanku rumoh di sinoe
 Dalam nanggroe nyoe ibu bapa
 Asai dilee di Madinah
 Teuma muminah keunoe bak raja
 Silayeue keurajeuen Malek Saleh
 Du lon neuweh keunoe neubungka
 'Oh mate ny'an laen meugantoe
 Raja pindoe reuloh agama
 Tamlekha peugah jihareutoe
 Harah teupat droe rumoh tangga
 Habeh jipeugah miyub manyang
 Hireun teuceungang yoh nyan raja
 Sabda raja neuyue intat
 Ubak teupat nyang jikata
 Tamlekha yoh nyan ka geuitat
 Jiseutot rakyat sajan sireuta

Tamlekha pi troh geuintat u gampong
 Tamong jurong leumah tangga
 Rakyat pi troh ek u rumoh
 Jihei meh-moh asoe tangga
 Saleh soe na di rumoh nyoe
 Neutren keunoe na peue haba
 Asoe rumoh deungo meunan
 Tren le yoh nyan ureueng tuha
 Ureueng tuha nyan that bit datok
 Ka jareueng ok di keupala
 Sion-on treuk tinggai di ateueh
 Nyum sang gapeueh puteh raya
 Umu ka jameun hana lagee
 Ok di ulee meuputa-puta
 Bungkok ngon rueng kulet ka krot
 Keuneng ka rhet teutob mata
 Ureueng tuha nyan seuot sidroe
 Saleh soe meuhei kamoe hamba
 Soe nyan di yub meuhei kamoe
 Pane nanggroe soe nan gata
 Rakyat seuot ureueng tuha nyan
 Deelat Seulotan suroh bak gata
 Nyankeuh jeuet troh kamoe keunoe
 Ureueng muda nyoe keunoe neu yue ba
 Ureueng muda nyoe kheun bak kamoe
 Nyang rumoh nyoe kon digata
 Jikheun baroe jicre sinoe
 Soe yue duek nyoe ubak gata
 Jinoe pi taweh gata sinoe
 Nyang rumoh nyoe kon digata
 Ureueng tuha deungo narit meunan
 Beungeh yoh nyan hu ngon mata
 Ureueng tuha kheun ngon amarah
 Cuba peugah soe nan gata

Meung ka meune meung ka meusoe
patot lon boh droe ho langkah ba

Bukon le utoh tajak teumaki
That beurani hate gata
Rumoh dilon sit du lon nyang bri
Le that taki lagee bak gata

Entukuh tinggai di lon rumoh nyoe
Pakon meunoe sabda raja
Ureueng tuha nyan sangat amarah
Tamlekha peugah sipatah haba
Teumpat Tamlekha nama kamoe
Nyang rumoh nyoe entu hamba
Ibnu Katen nama ayah
Baroesa leupah kamoe lam rimba

Tinggai ayah lon di sinoe
Leupah kamoe dalam rimba
Raja Kianoh alaihi laknat
Tuhan halarat droejih kata
Soe han pateh jih poteu Allah
Jikoh lidah badan jisula
Manyet jitet dalam apui
Tutong rangui angoth anggeeta

Di kamoe muplueng dalam gunong
Laju meutamong dalam guha
Jabai Kuluh nama gle nyan
Ramet jimeunan nama guha

Ureueng tuha deungo narit meunan
Teuingat yoh nyan 'ajab raya
Peue cit baroe nyan tapeugah
Sit barollah nyan ka lama

Lhee reutoh sikureueng thon raja ka mate
Han mupat le dum peukara
Ureueng tuha nyan baro teuingat
Sujud khedeumat bak ureueng muda

Baro teuingat keu ureueng gadoh
 Dilee meuteuoh ngon Nabi Isa
 Isa peugah yoh saboh roe
 Ureueng tujuh droe dalam guha
 Masa keurajeuen raja Kianoh
 Nam droe gadoh kunangan raja
 Ureueng geumubeue sajan sidroe
 Meunan saboh roe haba Isa
 Ureueng tujuh droe lapan ngon asee
 Isa bri thee untong muda
 Meunan teuingat baro teupike
 Neusujud le ureueng tuha
 Seumbah di kaki com di jaroe
 Kusyik kamoe lagoe gata
 Syeedara kusyik lon nyang gadoh
 Masa meuteuoh ngon Nabi Isa
 Seumbahkeuh rakyat ban saboh
 Troh meubunyoe ubak raja
 Raja yue intat bunoe keunoe
 Ureueng muda nyoe bak ureueng tuha
 Sabetkeuh beuna ban tapeugah
 Raja pantah beurangkat u lua
 Raja pi yoh nyan neubeurangkat
 Neujak peuedat ureueng muda
 Sabet ban kheun ureueng muda nyan
 Abeudorahman jak peumulia
 Raja pi troh rab ka keunan
 Neutren yoh nyan di cong guda
 Nyang phon raja mumat jaroe
 Lheueh nyan dudoe dum panglima
 Habeh bandum imum rakyat
 Geupeuedat ureueng muda
 Raja ngon rakyat duek meuhimpon
 Jaroe jiseuon ateueh jeumala

Lheueh mat jaroe duek meuhimpon
 Lakee ampon bak ureueng muda
 Raja teumanyong teuma dudoe
 Rakan nam droe ho saleh ka
 Tamlekha seuot raja teumanyong
 mantong lam gunong sideh lam guha
 Sabda raja bak Tamlekha
 Udeh rakan jinoe lam guha
 Taba kamoe kalon piasan
 Peureubuetan Tuhan dalam guha
 Tamlekha seuot rijang pantah
 Peue na salah jak udehta
 A m m a b a k d u nakeuh siat
 Neyue krah rakyat uleh raja
 Neumeung jak sajan ngon samlakoe
 Neumeung jak eu proe dalam guha
 Neumeung jak kalon peurusahan
 Peureubuetan Tuhan Wahidon Kaha
 Habeh geukrah yoh nyan rakyat
 Doli halarat kheundak meusapa
 Habeh meusapat sigala rakyat
 Kheundak beurangkat Seulotan raja
 Geusyik waki tandi bujang
 Uleebalang imum peutua
 Wadi kali peudana meuntroe
 Rakyat sinaroe sajan sireuta
 Habeh*meusapat dum sibarang
 Panglima prang ngon sabanda
 Habeh meuhimpon ngon sipai
 Sigala paki ngon ulama
 Sare habeh rakyat keunan
 Abeudorahman beurangkat u lua
 Raja yoh nyan neubeurangkat
 Habeh meusapat balatandra

A m m a b a k d u makna komdian

Jiseutot sajan saboh treuk raja

Kata saheb ampunya rawi

Naseurani jadeh bungka

Dijih pi le that habeh meusapat

Jiba rakyat ngon peutua

Raja Naseurani sajan beurangkat

Padum ngon rakyat balatandra

Dua raja beurangkat u gunong

Han peue tanyong balatandra

Raja Iseulam ngon raja kaphe

Han peue tanyong le balatandra

'Oh sare troh rakyat keunan

Tamlekha yoh nyan kheun bak raja

Ampon tuanku jaroe gaki

Rakyat bek tabri tamong lam guha

Lon takot teukeujot rakan nam droe

Raja pindoë jisangka teuka

Deelat tuanku jiteumee lawan

Jisangka rakan raja cilaka

Raja Kianoh jisangka keunoe

Rakan nam droe jithee hana

Nyankeuh seubab lon peuingat

Bek neubri rakyat tamong lam guha

Raja deungo meunan hareutoe

Muda samlakoe ban kheun gata

Jakalee meunan muda samlakoe

Geutanyoe dua droe tamong lam guha

Raja Naseurani jitamong sidroe

Ka jeuet lhee droe tamong lam guha

Geutamong pi troh lam guha nyan

Abeudorahman neubaca do'a

Neubaca do'a hana khali

Raja Naseurani iem droe saja

*A l-hamduli l-lahi l-lazi
najakum min dakyanusu*

Raja teumanyong bak ureueng nam droe
Padum uroe sinoe gata
ladom kheun yawman aw bakda yawmin
Meunan yakin lam keunira
Ladom jikheun na siuroe
Sikhan uroe ladom kata
Adat han siuroe sikhan uroe
Kamoe sinoe teungeut lam guha
Raja neukheun narit meunoe
Gata sinoe treb ka lama
Lhee reutoh sikureueng thon lam guha nyan
Teuma lheueh nyan teungeut indra
Gata pansan hana tathee
Meunan meuteumee dalam calitra
Padum raja laen meugantoe
Raja pindoe treb ka pana
Nabi Isa keurajeuen di nanggroe
Gata sinoe hana jaga
Nabi Isa mekreuet ka treb
Baro udeb gata lam guha
Raja tanyong ubak meuntroe
Pakri jinoe geutayoe tagisa
Sang na hajat dum geutanyoe
Tapuwoe jinoe dum u tangga
Tamaba woe jinoe sajan
Sit han jeuet han beuseureuta
Yoh masa nyan meuntroe tanyong
Bak ureueng nyan dalam guha
Pakri jinoe wahe teungku
Peue na napsu nibak raja
Neukheundak puwoe gata u nanggroe
Pakri jinoe jak udehta

Sit han jeuet han teungku neuwoe
Ban tujoh droe sajan raja
Ureueng tujoh droe seuot leugat
Hana hajat lon keu tangga

Hana hajat lon keu nanggroe
Bahkeuh sinoe dalam guha
Deelat tuanku neuwoe jinoo
Meu'ah keu kamoe dum barang na

Neulakee do'a tuanku keu kamoe
Beuteutap sinoe dalam guha
Nakeuh siat teuma dudoe
Ban tujoh droe neubaca do'a

Pinta do'a ban tujoh droe
Meunoe bunyoe dum geukata
Sireuta geuangkat dua jaroe
Ban tujoh droe siseun sireuta

A l-lahumma bihaqqi ma araitana mina l-'ajaibi fi anfu sina
Ala qabalta arwahina walam *yattali 'alaina ahadum*

Ya Tuhanku mupandang han le
Barang nyang lahe ateueh donya

Na bekkeuh leumah le nyang 'ajayeb
Kamoe bek treb tatueng nyawa
Bek leumah le kamoe tujoh droe
Beuseb ngon nyoe ya Rabbana

Do'a pi habeh nyawong pi gadoh
Siseun ban tujoh sigo pana
Kata saheb po karangan
Raja yoh nyan teubiet lam guha

Raja Eseulam ngon raja kaphe
Jiteubiet le sajan sireuta
Raja Eseulam saboh teumpat
Sajan rakyat balatandra

Raja Euseulam yoh nyan mupakat
Deungon rakyat dum barang na

Neuyue peumanoe ureueng tujuh droe nyan
 Neuyue peukaphan bandum rata
 'Oh lheueh manoe deungon kapkan
 Ulama sajan seumbahyang sigra
 Sigala rakyat dum leueng amin
 Paki miseukin lakee do'a
 Geusie keubeue troh meuribee
 Raja meujamee di lua guha
 Geusie keubeue geukhanduri
 Sigala paki lakee do'a
 Tujuh uroe raja khanduri
 Sajan paki di lua guha
 Pinto guha geutob yoh nyan
 Geulabo deungon geulak dama
 Lheueh nyan raja tanyong pakat
 Pakri mangat geutanyoe dum na
 Pakri mangat geutanyoe jinoo
 Keureuna gob nyoe beuragama
 Beumupakat dum geutanyoe
 Patotkeuh jinoo taboh tanda
 Saboh meuseujid patot takeubah
 Teumpat diarah soe na teuka
 Meunankeuh pakat raja Euseulam
 Raja jahannam laen bicara
 Raja Nasrani jimeujamee
 laen lagee dijih keunira
 Raja Nasrani kheun bek meunan
 Mate gob nyan agama hamba
 Mate gob nyan agama udeb
 Di kamoe pi wajib meuboh tanda
 Patot meupeugot saboh kubah
 Teumpat meukeubah patong beurala
 Meunakeuh pakat raja Nasrani
 Hana khali jiboh dawa

Dua raja hana mupakat
Meukeusumat di babah guha
Raja Iseulam ngon raja kaphe
Meuasoe beude rakyat that bha

Dua raja yoh nyan meusugang
Hingga jeuet prang meuseunoh guha
Keureuna guha nyan bak ceue nanggroe
Bandua droe geukheun areuta

Raja Iseulam ngon raja kaphe
Lheueh beude jeuet prang raya
Haba puprangan sit maklum le
Ladom mate beurangho na

Le alat puprangan sit tan maklum
Beude meutum laen pi na
Piasan prang le that bagoe
Maklum bak droe dum peukara

Meung ka jeuet prang meuhat pantah
Talo siblah kon bandua
Meunang Iseulam talo kaphe
Hana soe le ngon meudawa

Geupeugot meuseujid teuma di sinan
sipeureuti peureuman Allah Ta'ala
Lana t-takhizanna 'alaihim masjidan
Peureuman Tuhan nyang peunyata

Sare mate raja Nasrani
Geupeugot le meuseujid raya
Bak kubu Tamlekha geupeudong meuseujid
Ureueng keumiet beurangjan na

Nan Tamlekha beuna tatusoe
Di Rom nanggroe rumoh tangga
Meuseujid Rom pucakjih intan
Tameh lapan sit raya-raya

Dum na ureueng jak diarah
Rakyat barollah kayem teuka

Inong agam jak peulheueh kaoi
Asab meubhoi-bhoi beurangjan masa

Ureueng tujuh droe keuramat that
Peurintah halarat eelia raya

Nyankeuh wali dampeng halarat
Ka troh hajat soe meunada

Ureueng peulheueh kaoi geunab uroe
han tom padoe geunab masa

'Oh lheueh mate ureueng tujuh droe
Asee sinoe mate di lua

Iradat Tuhan meuleuha kudrat
Asee nyan meuhat masok syeureuga

Raja yue tanom yoh nyan asee
Teupmat meuteuntee di lua guha

Di lua meuseujid raja yue tanom
Meunan muphom bak calitra

Tamat Kisah Aseuhabon Kahphi
Tanyong Yahudi asai mula

Tanyong Yahudi ubak Ali
Habeh neukheun kri dum peukara

Ali tanyong yoh masa nyan
Nyo bit meunan lam Teerit kata

Seuot Yahudi phon beunalah
Hana ubah ban kheun gata

Meutamong jinoo agama Muhammad
Neulakee rahmat keu kamoe dum na

Yoh nyan Yahudi jiucap syahdat
Eleuham halarat dalam dada

*Asyhadu alla ilaha illa l-lah wa asyhadu anna
Muhammada r-rasulu l-lah; Yahudi pantah masok agama*

Aseuhabon Kahphi kisah le that
Maseng riwayat dum ulama

Khilah bandum ureueng mukmin
Maseng yakin akan Rabbana

Maseng takuwa keu poteu Allah
Maseng peugah dum ulama
'Oh noe kisah Aseuhabon Kahphi
Neutanyong kri bak ulama

Aseuhabon Kahphi ureueng tujuh
Beurangsoe troh jarak baya
Ureueng tujuh lapan ngon asee
Lon boh he sampee sinoe do'a

Tamlikha, Maksalimina, Martunis, Nununis, Sarbunis,
Paliastatiunis, Dawnuanisu; Katmi wabuduh
La ilaha illa l-lah Muhammada r-rasulu l-lah
Ya Abubakar, ya 'Umar, 'usman, ya 'Ali
Ya Jibra-il, ya Mika-il, ya Israfil, ya 'Izra-il

T a m m a t s u r a t uroe Sabtu
Watee teungku teungoh leuho
Kheu et hana got wahe sabat
Lon seumurat hana biasa

Dua blah uroe buleuen Zulka'idah
Habe h sudah tamat haba
Hajarat siribee lhee reutoh dua ploh sikureueng
Meunan geukheun lam calitra

Nyoe lon peugah teumpat surat
Na tatupat ulon rika
Matang Keupula ri Blang Awe
Teungku Ali nyang meurika

Meung na napsu lakee siat
Keunoe taintat he syeedara
Tamat surat wahe adoe
Rab cot uroe habe haba

T a m m a t a m i n y a R a b b a l - ' a l a m i n
T a m m a t k a l a m a m i n

=====



PN BALAI PUSTAKA — JAKARTA



Perpustakaan
Jenderal